



河南府志

ル 5
1546
2



115
1546
2

修輯河南府志序

河南府志自乾隆年間前守施公重修後
迄今百餘年矣刻板朽蠹錯簡尤多並有
散軼者若不及時修輯日久更難稽考文
獻無徵亦守是土者之咎也同治四年冬

肇鏞奉

天子命來守是邦下車伊始庶務紛如勤求治
理日昃不遑今春公事稍暇爰索藏書家
善本與及門錢少彭于厚菴兩廣文詳爲
校對朽蠹者修補之錯簡者釐正之散軼

者重刊之越五月而事竣因識數言於簡
端至於搜羅近事纂修而增益之則才學
識三者均有未逮以俟後之君子焉

同治六年歲次丁卯孟秋月河南候補道
知河南府事武進陳肇鏞謹序

河南府志序

河南郡之有志自宋學士宋公次道始序
 之者為相國司馬溫公刻之者為留守文
 潞公一時天下操觚之士翕然稱之為良
 史才幼讀傳家集思見其書未得也乙未
 冬誠奉
 聖天子簡命來守是邦適前守王公有事於志
 乘乃以調去屬余竟其業余曰非宋公之

書弗善也遂徧索之卒不得復取溫公之序細按之始矍然嘆曰作志之難果如是哉溫公之言曰次道之爲是書也因乎韋述之兩京記而其間宮室城郭山川津梁亭驛廟寺陵墓之名數與夫古先之遺迹人物之俊秀守令之良能花卉之殊尤無不備載十倍于韋記開卷粲然如指諸掌其真博物之書者與夫志輿地難志輿地一而及于三川郡則更難蓋自河洛開竒龜龍獻瑞天地之大志已存乎其中而周營漢都山河之雄深偉麗人才之磊落英多三區勝景園苑香林爲宮闕爲宅里爲園圃動者植者踵事而增華者學士大夫之登臨而流連者真難以僂指計古人所云擅六合之靈竒標八方之勝概洵不虛矣然則欲爲紀載者豈不甚難哉惜乎次道

之書之不得一見也溫公又稱次道性嗜學其先正宣獻公蓄書三萬卷次道自毀齒至于白首從事其間未嘗一日捨置故其見聞博洽當時罕有倫者噫由此觀之次道之書誠善矣然則後之爲志者當何如其難哉誠受事以來每惴惴焉懼不克勝任而披覽舊志簡而未備求所謂粲然如指諸掌者蓋不可得然後知宋志之失傳也久矣會老友童君二樹今之博雅君子也延主此席復邀同郡之紳士相與商榷體例惟奉溫公博物一言爲圭臬廣覽墳典旣按部以就班更振綱而挈領一事必尋其原一人必考其實無臆說亦無濫辭閱兩歲書成編爲卷一百有二十爲綱二十有二爲目一百十有四非敢誇多前人實由運際郵隆生逢

聖世右文之日遺書盡出且得久于斯任以竭
其旁叅博考之忱而又藉創始者先啟我
以端也豈非誠之厚幸也歟抑予聞顏師
古之言曰志記也積記其事也夫人生千
百年後尚論千百年以上之事非載籍何
所証據乎而舊志悉無之此誠數年來慎
之又慎所以不敢仍舊者此也惜乎次道
之書之不得一見也雖然天下不乏藏書
家他日有以宋志來者當亟刻之并倣其
例而續成之則是志亦可以無庸矣是則
所望於後之同志文獻者

乾隆四十四年歲次己亥仲春月河南府
知府會稽施誠謹序



世承會稽...
 神聖...
 而...
 宋...

舊序

河南郡志序

宋司馬光

周官有職方士訓誦之職掌道四方九州之事物以詔王知其利害後世學者為書以述地里亦其遺法也唐麗正殿直學士韋述為兩京記述故龍圖閣直學士宋君敏求字次道演之為河南長安誌凡其廢興遷徙及宮室城郭坊市第舍縣鎮鄉里山川津梁亭驛廟寺陵墓之名數與古先之遺迹人物之俊秀守令之良能花卉之殊尤無不備載考諸韋記其詳不啻十餘倍開編粲然如指諸掌真博物之書也次道性嗜學先正宣獻公蓄書二萬卷次道自毀齒至于白首從

事其間未嘗一日捨置故其見聞博洽當時罕倫且嫻習國
家故事公私有疑咸往質焉又喜著書如唐書仁宗實錄國
史會要集註史記之類與衆共之或專修而未成者皆不計
外其手自纂述已成者凡四百五十卷蓋昔人所著未有若
此其多也次道旣沒太尉潞公留守西京其子慶曾等奉河
南志以請於公曰先人昔嘗佐此府敘其事尤詳惜其傳於
世者甚鮮願因公刻印以廣之豈徒先人蒙不朽之賜於泉
壤抑亦使四方之人未嘗至洛者得之如遊處已熟後世聞
今日洛都之盛者得之如身逢目睹也幸公留意公從之且
令光爲之序光於次道友人也烏敢以固陋而辭

河南郡志序

順治十六年

國朝

翁長庸

中州守三韓朱君修河南府志成余讀之不禁廢書三嘆也
河南古豫州地居天下之中背邙面洛西澗東澗挾崤函之
阻總風雨之交誠天地之隩區而九州之上腴也然地扼秦
隴介趙魏四方之所必爭天下無事則已有事必先被兵自
成周迄今不知歷幾盛衰而世運隨之故李文叔之言曰洛
陽之盛衰天下治亂之候也周以前無論已周公營洛實始
建鼎召畢君陳相繼保釐化行俗美而天下大治周室中圯
王綱解紐篡弒之禍日尋而洛人蘇秦申不害韓非之徒以
縱橫法律之學分鑣並驅毒流宇內王風蕩然浸以滅亡此

洛陽之一變也漢興吳公守郡奏最治平一時循良接迹海
內向風故西漢之俗最爲近古光武卽位宅中圖大同符高
祖建武永平之間天下稱盛治焉桓靈以降世衰道微冰雹
地震之變叠見東都駟至強臣竊國宗廟爲墟此洛陽之又
一變也若乃夷甫之清談誤國季倫之後泰成風華林西苑
之興荆棘銅駝之感隨風波靡江河莫返而五季之亂成矣
唐宋之世禍亂間作滄桑代更上下數百年間其爲變莫可
紀極而蛇鼠之鬪杜鵑之鳴識者有先事之慮焉未有洛邑
治而天下亂者也未有洛邑亂而天下治者也迨勝國之末
風俗日頹士大夫狃於宴安華侈成風卒致寇盜蜂起叛將
獻城之難作而中原土崩洛陽之變於斯極矣惟我

皇清統一區宇攙搶電掃羗夷靡餘然後收京野之骨掃臺榭
之灰雒之人復見太平而免於兵革歲己亥朱君來守是邦
越二年政通人和百廢具舉所謂令修於庭戶數日之間而
人自得於湖山千里之外者將於是乎在然而典物淪亡風
流散失思夫城郭之巍峩宮闕之壯麗平泉花木之饒金馬
承明之舊欲問其遺蹟而故址頽垣無復存者求之邱墟陵
谷荒烟白露中宜朱君之愾焉嘆興也於是乎郡志一書起
而纂修之會大中丞檄下郡國有事茲舉乃徵攷文獻敦禮
鴻儒偕進士何君暨學博茂才共相釐正條分縷析綱舉目

張凡星野輿圖山川人物土田貢賦以逮文章節烈之數莫不犂然畢陳而朝市之變遷名園之興廢咸序而列之亦古今盛衰治亂之林也後之覽者俯仰興亡考鏡得失其必有以吳公之治平繼周南之雅化者四方將於是乎取則焉則是書也爲朝野之龜鑑爲史家之嚆矢而不徒以洛陽佳麗誇示後世爲騷人墨士登高作賦之一助也朱君之功其何可忘也是爲序

河南郡志序

順治十六年

國朝 朱明魁

曩令星沙聞漢南有召伯循行祠址未嘗不慨慕於分陝化被之遠也已亥報政以田功躡遷洛守迤邐自西得之道里經歷長老傳聞覺當年營度規模赫赫若昨日事自維謗劣濫膺茲土近聖人之居身親禮樂文章之化豈非吾生大幸歟雖然抑猶有慮上下數千百年爲問周公召公其人存者乎其政有存者乎微獨周自漢唐宋以來亦復有存者乎且也銅駝荆棘陵谷滄桑人物凋傷風流散失茫茫今古莫知紀極論世者何從指而目之爲某人爲某地爲某事一一操符契不爽哉曰有志在志與史相表裏其世系年表世家列傳之類一準於史而書人書地書事較史爲詳所謂列國之史此也志之功於方土綦重哉洛陽爲古帝王定鼎地風土文物迥踰他郡觀班孟堅之賦李文叔之論得其指矣顧

可使之湮沒弗傳耶洎於明季豫當秦寇之衝南郡實罹首禍川原盈血城郭爲墟焚書坑儒之慘不烈於此此時卽欲撥拾斷簡殘編其叩之王弼之塚乎苟留心世道之士從流離患難中覩記忠孝節義情形登諸掌錄用俟將來嗚乎可不謂難焉則修輯之必以其時蓋有然已恭遇

聖天子御極底定中原永清四海庶幾復見車書一統之盛焉大中丞公方伯公拳拳檄修豫志將匹休分陝故蹟而重光之甚盛典也明魁職在牧長且夙負斯志敢不黽勉以從爰諏吉旦禮延博雅名儒鄉紳何君栢如博學彭君虞彥子衿潘生景星賈生承德姬生用中董生正開局纂修分部蒐討彙諸邑志乘芟其繁猥增所未備而折衷於洛之鉅公務期謹嚴傳信無悖史裁而止諸君子畢智考訂無間晨夕勒成一代良書明魁暨寮友單君教黃君綬首邑令楊君苞郡學博侯君抒懷時過從而叅閱焉計始事於己亥冬卒業辛丑冬季付之剞劂再歲竣工書成受而讀之圖誌犁陳源流具載如攬河嶽全勝焉如承周召遺風焉覈田賦則思女修織祗男務耕耘之舊崇學校則追洛陽多士風俗爾雅之懋披人物之林可徵忠義叠見溯宦流之籍應知俎豆如新至於藝文泉湧科第雲興益信文字啓於圖書賢豪鍾於嵩嶽矣明魁因是而感焉洛邑居天下之中陰陽風雨所和會人稟

中和之氣以生大都有豫象焉名之豫州義有取爾夫豫之
爲言舒也司牧者由繹斯義則保釐剛柔之道可推已姑無
舉其凡如召公化行南國遺愛甘棠吳公守河南治平爲天
下第一柳仲郢爲京兆政嚴明後出河南以寬惠是皆神明
於因地宜民之治者耳今生民兵燹之餘噢咻而長養之猶
慮弗逮况乎其以重典試也幾何不益鑿乎明魁不敏家乘
旣無治譜又未敢希秘授於金簡玉牒唯願與寮屬諸君手
此一編以當法戒庶無失修舉意哉謹序

河南郡志序

順治十六年

國朝

董篤行

平州之有志也始於唐韋機之兩京記迄宋宋敏求纂修焉
而志一變越元至明雖作者雲興如文靖公在著作之庭且
三十年未聞有所補益豈所稱鄉先生實錄者耶况乎滄桑
繼變舉媧之石奭之棠喬之笙半淪沒於青燐碧火間後起
者又烏從而識其大識其小哉我

皇

上平定中原誕敷文德選於衆俾郡伯朱公來守是邦蓋欲
以典章文物爲治平第一務也下車二載餘政通人和河屬
不先得我所之謠焉治暇攬中州山川而悅焉會鄉之諸薦
紳言及風土人物意將裒集而誌焉值大中丞檄下郡國謀
以纂修事郡伯卽商於別駕單公司李黃公總其成延郡邑
之名公碩儒三四人俱雪窗冰几中夜不輟逾月告竣而工

里來徵序於余余以河屬爲九朝都會地宅中據勝雖一郡之文獻而十二州之擘建千百國之風習悉指臂相關焉是必得燕許手筆以推重一時然後可余何敢漫爲序也乃郡伯爲余言曰吾於志首不過清其大綱如伊洛與河伯鬪撓而不濁繼不過嚴其紀錄如崧高之俯眎崑嶷堅方而峭大然後條理備經絡聯屬書摛詞指事類情雖氣象萬千大意如是而止余因取全志觀之其大綱清也紀錄嚴也條理備經絡聯也屬書摛詞指事類情氣象萬千視古唐宋志果爾又一變也其疆域形勝諸圖說近世無工畫者余亦不具論論其大者若彙人物以及邑志之繁列鄉賢以補通志之略巨宦蹟有紀矣必如東郊保釐等則錄之科目有紀矣必如治安對策等則錄之卽忠義亦有紀矣必類龍逢之直樂羊之妻者則錄之至重莫過田賦因田定賦計口編丁則畫一之全書具焉及所列學宮陵廟則

國家之大寶器藏焉至文以紀事先之以

王言我

皇

上詢租之詔邁漢唐而爭光日月次之以奏疏詩賦蓋

昭代之文章又與班馬李杜並駕而驅於戲觀止已是役也郡伯與別駕司李持繩釐正一循於墨而分之者同人何蒙公之雅諳史裁學博彭公擇之秉直嚴律諸生員姬生用中

潘生景星賈生承德又皆按部而較正之余雖備員京華不
遑共事一堂然有吾姪正侍諸先生側而卒業焉則余亦與
有榮施矣是余又烏可以無序也倘

天子臨軒採謠問今天下有如治平吳公之得賈生其人者
乎吾將執是以對

河南郡志序

順治十六年

國朝 傅景星

昔吳公守河南治平爲天下第一薦賈生陳王道述禮樂改
正朔易服色基兩漢文治之盛杜當陽建盟津河橋造生民
未有之功復以餘力註左氏春秋爲後世學者師資之二公
者皆以事業著於洛中而或以薦賢開文治或以著作翼經
傳其炳蔚千古無兩也頃者大中丞檄郡邑纂修志書郡大
夫三韓朱公以吳公之治行兼當陽之書癖府志之修舍公
其誰乃復謙讓未遑延進士何君偕博士茂才職詳而分理
之乃躬爲裁定藻飾焉迨如公孫僑之爲辭令博謀於馮簡
子子太叔諸人而已因以潤色從事其後也書成徵序於余
余自告老以來筆墨久疎且迫於賤事卒無須臾之間得竭
志意幾欲效子犯不文之辭而誼有未安因念吾郡處天下
之中天地之開闢在於是神靈之肇造在於是自河出圖洛
出書羲禹已立萬世文字之祖徵四靈寶道之瑞矣蓋日月
之所交也風雨之所會也明山大川之所拱衛也詩書禮樂

之所基始也賢哲之所治教仁義之所設施固累朝歷代之所號為赤縣神州四海八荒之所于焉朝宗則效者也茲欲舉而志之粵稽往牒其書契所紀有關於吾里者自六經廿一史諸子百家以迨稗官野乘即細及伽藍有記名園有記與他通都大郡不可同日語其盛衰廢興之跡關宇內之治亂與他通都大郡亦不可同日語故載筆之家患蒐討之未廣亦患猥雜而失體蓋憂憂乎其難之哉今斯志也披閱一過細大咸舉詳略得宜洵無間然矣然吾因之有愴然於心者河洛自古稱名都會余生長斯土猶及見其壯麗繁庶之舊而燹燬燎原城邑煨燼土田蒿萊銅駝在於荆棘士女聚

為京觀雖晉永嘉唐天寶之亂不烈於此觀志而追數疇昔如白頭宮女說開元遺事搔首顰眉形神憔悴伏几幾出涕今幸

朝廷政教日新大夫朱公高張化瑟庭羸之餘漸有起色名都繁庶之舊將復見焉衰之極盛之始此一時也則余讀斯志而愴然欲涕者又且三復斯志而有其喜洋洋者矣朱公行如漢吳公進為輔弼携斯志於國門與金匱石室之史並傳蓋功不在杜元凱註左氏以翼經傳之下云

河南郡志序 順治十六年 國朝 陳 爌

豫當天地之中而雒自姬公營京陰陽風雨所和會物華八

瑞所鍾毓於山見嵩之巖嶠而正直於水見河之濛瀚而紆
迴南三塗北嶽鄙伊闕轅函谷武牢表裏形勝古稱京邑
金城秦楚晉衛燕趙蜀魯咸輪蹄輻輳冠蓋犇走其郊有德
易王無德易亡莫不以斯州卜海內之治亂焉前此流人沸
羹血郭骨野澗灑金谷鬼爲窟穴彌望桃林土濠蒿棘參天
春燕無巢鷓鴣邦灰燼郡且墮何有乎志志之散佚於諸故老
大家名賢逸士之所掌錄者僉罔回祿如汲冢斷竹岐陽石
鼓烏從而斯厥蒼素哀厥漏遺垂不刊之典書歟

聖朝應運御乾廓清中土狻猊伏莽次第草心青燐變而沃壤
敷鴻變而垣墉佩劍變而買犢鳴而佻達變而絃誦經雅蒸
蒸郁郁復覩雉資越裳學建靈臺之盛於是八郡州邑志悉
告成凡星躔輿圖戶口賦役職官貢舉節義文辭傍逮百代
方技仙釋要取其神益風俗闡述理道者一一可按籍而興
也獨聖賢帝王忠孝之大者汗牛難載得之吾維尤踵接於
列代間矣故達觀灼識不第以斯州之盛衰卜海內之治亂
抑將以斯州文獻之興替卜海內政教之盛衰也余翼珥筆
承明金馬朝夕

講幄闕天下所上山川扼塞生齒版冊異域殊方入奉

王會者寧止千億百國迄今備藩百二歷覽神臯奧區屯金
虎而通宏農唇控肘倚始信豫之與雍胥屹然拄撐天門地

絡漣澶九曲伯仲華嵩班孟堅賦兩都而垂重乎東都旨哉
 茲際尉侯同力循卓茂登祭翁朱公祖以治行第一繼漢之
 吳公而卯翼噢咻陸渾郊廓之區鳴吠相達石田鋪菜化洽
 周南乃更手郡志而晰其疑雁蒼素以明哀其闕略漏遺統
 貫洵國乘之楷模藝林之瑰瑋已爾兼欲使後之牧我印穀
 退食梅花冰署間無競而絳無猛而寬無驚擊而塵定其於
 陰陽風雨物華人瑞不永有以作之範貽之祉也歟哉今

聖天子方開秘閣萃鴻儒一統全史綱張日維蒐輜軒之副墨
 輯稗官之纂述始必駕汲冢掩石鼓以典謨訓誥之章勒日
 星鐘簾之紀裔皇奕禩其以吾雒之志之為之嚆矢也然則
 祭翁公祖嘉惠天中功詎遜姬白營京下歟余故樂得而

河南郡志序 順治十六年

國朝 何栢如

栢如有事郡志博覽諸州邑紀載與二三同社分部較讐始
 事於孟冬脫藁於臘半既付梓應有俚言跋其後栢喟然太
 息曰郡志之不修幾何年矣使需以歲時繙閱全史其所就
 尚有可觀乃經營匆劇紕繆多端栢之責也至析疑正譌苦
 心具在他若雲物風土山川秩官科第錢穀諸欸悉仍邑志
 不敢竄易一字人物應論時代也邑志輒序爵彼邱清吏曹
 廣文豈赫赫盛位何至今膾炙人口耶藝文必傳正人也洛

八景詩不錄呂忠節而錄沈詩沈以刑餘之夫行固無取入詩數雜撰不足觀應刪去或曰存之洛人頌之已久也端入節婦必俟蓋棺論定生前列傳殊礙臬裁或曰仍之善善不妨存疑也近者松山朱公盡節明室載入國史固也郡志特尊其名者郡公祖凜凜忠臣之嗣也寶豐尹黃公稱循吏第一汝志既詳郡志復傳其碑者司李公祖五世清白吏之後也忠臣良吏食報不爽而太史公言天道無知是耶非耶栢自束首受書抵今纔幾春華耳弔勝國之遺編觀

興朝之實錄展卷相對感慨係之因念栢先世科名宦蹟累累先君子淑身示訓栢與家兄弟三售禮闈時代雖殊而淵源相接同附郡志以傳豈非栢之大幸與古人有云易盡者身也不朽者名也北望卽嶺眺金谷故址寒鴉衰草點染名園尚有昔時繁華其人者乎後之視今猶今之視昔汨汨百年亦何不爲不朽地耶故士惟患修名不立耳勿慮名跡湮沒也代有作者且珥筆而隨其後矣

河南郡志序

康熙三十四年

國朝

張聖業

河南古洛邑也自漢唐宋以來宮室之壯麗人物之殷蕃商旅之輻輳每爲天下甲故景運聿興之世縉紳大夫勒功旂常而優游退食者往往卜居於是相與酌酢而觀遊焉登臨覽勝之士常以不得一至其鄉爲恨故洛陽之盛宇宙昇平

之象係焉迨明之末年流寇肆虐而前賢之遺蹟文獻之舊章皆爲灰燼矣我

國家之興招徠而煦育之荒者以辟仆者以起散者以聚而識者已知洛陽之將盛歟洛之盛則太平玉燭存不在宇宙間哉於時憲檄有修志之令而郡之縉紳先生皆曰是不可以或緩也

國家文治之隆軼於往古自必有輶軒之使出而采聽風謠旁搜軼事而我洛陽舊乘缺遺文獻無證寧僅一郡士民之差乎乃相與網羅筆削芟繁去譌參互考訂而是書以成乙亥冬予承乏來守是邦郡之鄉先生向予而言曰吾郡之志書將竣矣前太守有序焉請弁其首以誌不朽予思生自三韓入關之後官於工曹者二十餘年一旦出守茲土未浹月也此邦之形勝猶未覽焉千百載賢聖之故里古先民之所慨慕而謳思者猶未親歷其鄉而弔望之也予何以序爲雖然予下車以來見其俗勤而淳見其民樸而和絃誦之聲聞於四郊而士皆質而文吾於是而知洛邑之風古道存焉其將兆

國家之盛而登斯民於衽席歟乃於公餘之暇取是書而校閱之則見夫條陳理晰綱舉而目張攷其都邑之所載則古先王之坐明堂而朝羣后者其貽跡猶班班可數也覽黨庠

術序之規則壤成賦之制而知教養之方瞭然在目也觀聖賢豪傑之所居而不禁神游其地也觀忠臣孝子之鄉與哲人修士之所棲息者而並不自知其欲譎而欲泣也夫觀風問俗而誌其美且以下熙皞之治於將來者太守職也因爲之序

河南郡志序

康熙三十四年

國朝

孫居湜

居湜奉

簡命守中原及二載俗厚民淳喜無多事暇時取志書一一讀之自星野疆域黨庠州序節義文章田賦戶口以及名物勝蹟亦既詳哉其言之矣洛陽爲九朝都會地文獻之富較他郡爲倍明季兵燹之後化爲灰燼當此之際而能收拾於斷簡殘編之餘表章其忠孝行誼之美清大綱嚴細目比事屬詞用垂不朽俾前古後今之烈不至如媧之石奭之棠喬之笙同湮沒於青燐碧火而無存伊誰之功也然前志之成在順治己亥庚子間迄今已三十餘載

國家文治日盛教養日隆學術益修明生齒益滋殖人文蔚起綱目張挾不及今爬羅剔抉續成全書則四十年間之治安文獻何以彪炳於奕世蒞茲土與生茲土者不均有其責歟適憲檄有徵取郡志之命而諸邑志乘亦次第報成居湜因與寮友朱君慨焉首事延訪鄉紳碩儒雅擅史裁者董

君正范君焜楊君名遠董君元輔彙輯成卷缺者補之略者詳之譌者正之荒悖者芟之每著一冊再四商確三閱月而告竣居湜取而觀之山川名物雖復如舊而圖考按之輿地學制益以新規丁差田賦朗如眉列可以按籍而施孝義忠貞爛若星輝可以聞風而起蔽芾保釐之遺澤若加其新也治平寬惠之徽敞如睹於目也丹書赤甲之瑞不啻再見于今日也維嶽降神之休文武吉甫接踵而繼武也爲治爲學之要不已略備於斯也耶居湜忝牧斯地學不曾登程邵之堂治不能踐吳魏之迹惟以俗厚民淳休息是急如三韓朱君所云噢咻而長養之者余誠有志然利不及以時而興弊不及以時而革一仰被

命將又有江右之役徒抱虛願何益斯人因思古今來越世而後始有傳人三代人心直道斯在若漢若唐若宋理學名家口碑載道豈僅如志乘所載程邵吳魏諸君若而人而越世而後程邵吳魏諸君而外姓字磨滅俱已無聞也然則泣茲土生茲土者必其精神力量有以不愧於程邵吳魏諸君若而人而後可以與此書並存而不廢不然求其與媯之石夷之棠喬之笙同湮沒於青燐碧火間而不可得也嗟嗟此誰之責也夫嗟嗟此誰之責也夫

河南郡志序

康熙三十四年

國朝

朱作舟

粵惟元公卜洛南望三塗北瞻嶽鄙營茲王城是爲東都蓋
二南起化之地郊廓之籓籬也其山川蔚秀襟嶠函而帶大
河四方道里惟均陰陽之所交會風雨之所磅礴自漢以後
推股肱郡焉後代沿革不一逮其衰也城郭邱墟宮室瓦礫
東西行過者蓋不能無禾黍茂草之感而簡蠹編殘碑斑碣
蝕形勢猶是風土大非蓋已荒軼弗可綴拾矣余承乏郡倅
歷有年所丁卯庚午間兩理守篆嵩頰函谷諸名勝皆能以
時游歷親趾其地憑弔往蹟諮諏舊聞因之攷其土宜核其
民風歷代廢興盛衰之故瞭如指掌時於簿書暇晷緝閱舊
乘散佚缺畧不能無遺憾焉猥欲摭拾編次之未遑也今

聖天子文明首出車書和會一統志成頒行海內而前中丞宣
鎮閣公會有續修各志之檄江都汪公時肩其事蒐輯略備
而編帙未充會我燕山孫公以

當守特擢來守茲土興廢舉墜酌古準今越明年政修人和百
務具理乃披檢舊稿網羅而筆削之芟其繁訂其譌叅證其
謬補輯其散佚嘉與里之賢士夫迭稽遐搜潤色成帙秩
序稱善本而以屬予序予惟宏農居天下之中風土古今
不改視守土者之經畫措置黼黻太平潤澤教化而人物里
俗乃爲之翻然一變岡陵亦獻異也昆虫草木亦發靈也孫
公治郡遠軼潁川渤海而洛汭河湟之間不一年殘敝頓起

視昔之荒涼榛墟有間矣觀原隰之繡錯則今昔戶口之凋
庶可知也慶時賢之蔚起則今昔教鐸之振廢可知也覽其
山川景物疆里貢賦則今昔治理之盛替可知也是編一成
上之大府嵩少石室之藏書燿煌並燦河洛地窟之秘圖洋
溢呈章人文化成孫公有焉豈徒備輜車之葑採抑亦爲後
起之龜鑑乎謹序

河南郡志序

康熙三十四年

國朝 袁拱

自班固易司馬遷八書爲十志後世作志者莫不以固爲源
本然江淹以爲作史之難無出於志而鄭樵亦云志者憲章
之所係必老於典故熟於史籍然後能爲故各雖沿於固而
義例實備諸史也河南古豫州地居天地之中風雨所會陰
陽所和控以三川固以四塞龍圖龜文昭其靈周鼎漢臺鳴
其盛魏晉卜宅隋唐建都降神則嵩高生申毓聖則夾馬啓
宋九朝之都會四海之腹心東西朔南輪蹄之所輻輳燕趙
秦晉冠帶之所往來忠直循良接踵而臨名賢竒才連茹而
出風謠變異足占九州之治亂道德文章足徵千古之盛衰
賈誼張說藝文獨步於漢唐兩程堯夫理學開宗於河洛金
谷平泉名勝兩間香山綠野流風百世繡嶺宮闕砥柱竒峰
羣邑繡錯莫可殫述使彙集成書而以彰往察來體物觀民
爲史家之蒿矢吏治之金鑑豈非盛舉哉顧時變滄桑銅馳

荆棘城社且爲邱墟何有乎志我

國家車書一統無遠弗届文教蔚起典章文物之事炳焉與三代同風前撫臺公祖亦有纂修然規模草創不克大備迄今三十餘年事跡散遺記載闕如觀者不能無憾焉今值郡伯孫公以龔黃政教擅班馬制作各震宇內如雷霆如河漢人皆得而觀聞之

聞其賢特簡河南太守甫下車卽力除弊政解釋困疲保善其法蓋千載一時也乃政事之暇取郡志一書而纂修之援

古據今芟煩就簡事典以核辭質而雅正紀綱節目之分嚴

豕亥魚魯之辨雖專門名家有所弗及也故稽其山川疆域扼塞要害之勢則當思守險固國之略稽其土壤戶口賦役多寡之數則當思登耗墾廢之由稽其城鎮官方沿革裁設之故則當思制置變通之術關梁郵站道里遠近之必悉而節均勞逸可知也風俗貞污物產豐儉之必陳而整一董率可知也名賢理學忠孝節義文章經術之必闡而向往規隨可知也次舍禳祥有所觀察然後敬戒以修焉鎮獄雩禱有所感格然後典禮以行焉科貢選舉有所振作然後人材以興焉泉源水利之或湮或濬防禦譏察之或疎或密庠序坊表之或圯或修以篤民庸以嚴警備以興士行咸得以考鏡

焉則此志也實政治得失之林而郡邑致治之本也使披圖攬要因志著功不獨一時守令並樹分陝之猷且使後之有位君子知夫從古以來中州之安危關乎天下之重輕而慎飭其政治以鞏固

皇圖則此志之修其所裨益當無既也詎僅山經水紀寶典秘冊侈文章之炳蔚飾人物之繁盛哉公博綜經史吐納雲霞卽事成書著作如林山河遙徂雖未窺其全豹然卽此郡志亦足見其一班蓋駸駸乎入左馬之堂奔走孟堅於廡下江文通所爲韜翰遜謝者也令鄭夾漈見之寧復有餘憾哉全志告成光燁

國乘拱草野蕪言不能揚厲其萬一聊以之貽哂云爾謹序

河南郡志序

雍正五年

國朝

張漢

予旣守河南郡之三載按郡志周歷名勝未及半時復閱郡志卧而遊焉所以補其缺也客有過予者時時訊郡中名勝予笑不遽答客固問予曰物有物始人有人至物亦有物至舉其詳他郡有能爭勝者罰我巨觥吾不辭客曰何謂物始予慨然曰嗟乎彼造物者何爲者乎無始之始渾渾悶悶吾不得而言之矣自有天地斯有黃河而河出龍馬圖之始也有河有洛洛乃出龜書之始也闔山采金鑄鼎象物鼎之始也金門斷竹觸孔成音律之始也陽虛象形鳥跡我師字之

始也有音有字叶律諧聲採風擇謠二南冠之詩之始也他若嶠嶢廣成久視長生仙之始也柱下授言道德五千道之始也白馬負經入傳中土佛之始也以問鄰郡有或之先者請巨觥從事客謝未能曰請問人至予曰嗚呼至人至矣盡矣蔑以加矣生於斯都於斯仕於斯遊於斯老死於斯吾歷歷能記粵自上古下迄晚今皇也而至牝義軒轅帝也而至高辛堯舜王也而至禹湯文武聖也而至周公孔子隱也而至箕山潁水忠也而至龍逢萇宏義也而至夷齊關羽臣也而至燧人四佐稷契伊傅呂望召伯武也而至雲臺四七史也而至二班司馬賦也而至相如左賈博也而至司空張華書也而至曰鍾曰王詩也而至曰杜曰李學也而至程朱邵張文也而至韓歐三蘇下至數也而至鬼谷袁李醫也而至盧氏扁鵲辯也而至六國蘇子壽考而至錢鏗久世幼慧而上上卿甘羅富也而至郭况石崇他如山則有嵩五岳之長也水則有河百谷之王也啟母之石世莫爭其奇召伯之棠世莫爭其名漢封之栢世莫爭其壽也金谷平原世莫爭其勝也洛陽牡丹九十餘品凡百卉木莫與爭其王也夫物亦何一非其至者哉客於是嗒焉自喪喟然嘆曰有是哉斯郡之勝也予不復請矣客退予述其語書郡志且遺同志焉

續河南郡志序

雍正六年

國朝

張漢

予前序述人物名勝詳矣未述續志之由也考舊志斷於康熙之辛未今將四十年無人記郡中事志遂缺予聞而憂之徵文考獻乃有續志之役嗟乎作史之難也才學識三者缺一不可者也予既乏三長竊準史例爲郡志鋤繁著潔比事屬辭尚知體要而爲之蓋其慎也總郡志舊遺者補新出者續於人物藝文吾尤慎人物懼以妄者欺後人藝文懼以惡者玷前輩以前志皆各人名作懼弗稱而藝文則又問錄予作以予歷斯地適有斯作不得已補名勝之缺而又未嘗不愾然自愧其不盡慎也且藝文予復創爲經目冠其前經目舊志原無載天下郡縣志亦無有河南一郡則五經之總萃也舊志裁裂章句入藝文予謂非宜乃特列經目列目者何以五經文不勝錄抑五經亦天下人人共讀之書也於是次史日子目集日列爲四部餘乃及詩古文詞是役也洛陽范博士百順暨洛生家雄圖董其役先輯諸條列予釐正刪裁然後定又命兒子輩校譌以問梓人區爲四冊五閱月事乃罷嗚呼史記一書太史公發憤感激之所爲作也予以舊史留滯周南凡五歲簿書無虛日回想在館職時奉

勅纂

四朝國史未成事不獲錄其大者重者何取區區一郡而志之雖然在一郡則書一郡亦史氏之職也期無負此一郡而已

河南府志

凡例

一卷首恭編

聖製者尊

王章也我

國家樹基纘緒

聖聖相承

皇極敷言有典有則載在左史非外乘之所得而書也然
聖謨洋洋經天緯地既宣示四方無遠弗届矣且河南處天
下之中聲教所及愈于他郡自我

凡例

聖祖仁皇帝暨

今上皇帝巡幸 中嶽名山勝地咸邀

睿藻山川之光亦萬世之幸也敬集一編以冠全集名曰卷首
以別于歷代臣工之作而

列聖宸翰之在境內者亦備載焉

一志必有綱綱舉而目始張矣維王政始自疆理因地法
天正人之紀作輿圖第一郡邑易置歷代靡常作沿革
表第二象緯成列圻界以分作星土志第三樹壘封溝
慎固厥中作疆域志第四嵩高維嶽河洛呈象奠我中
土作山川志第五設官守土非公署無以出政非城池

無以防患作建置志第六秩有崇卑政有繁簡上下相
維庶績以熙作職官志第七至于峴碑墮淚棠樹興思
而名宜稱焉故并及之有地則有稅有身則有庸作田
賦志第八邦本之固實在康阜作戶口志第九土性旣
殊人習亦異觀其所尚而設教焉作禮俗志第十資民
用辨土宜考厥紀載以徵故事作物產志第十一國之
政教事神卽所以福民作祠祀志第十二育才善俗莫
先于教作學校志第十三聖人養賢以及萬民取用之
途雖殊然要以得人才同政治作選舉志第十四虹流
鳧降本其所生作帝紀第十五過化之鄉非寓賢所倫

作聖蹟志第十六嶽秀川靈毓英啟後在邦在家後先
踵跡作人物志第十七人闕人而爲世興廢之繇有足
慨者作古蹟志第十八事以辭見人以文傳鑒往昭來
全憑載籍作藝文志第十九殘碑斷碣足以訂經補史
探竒集古學者寶之作金石志第二十稽古右文代有
盛舉况世際昇平墳典競出廣意蒐羅統以四部作經
籍志第二十一天有灾眚徵諸人事詳考史冊用垂法
戒作祥異志第二十二夫志必先輿地故圖先之次沿
草沿革明而疆域準有疆域自有星野仰觀俯察故先
星野次疆域山川附乎疆域者也故卽次之有疆域始

有建置有建置始有職官有職官而後有田賦有戶口
有禮俗有物產而後崇德執功之事興矣故繼以祠祀
民必有養養必有教而人物生故次學校次選舉次六
物古蹟因乎地亦因乎人故又次之藝文金石經籍皆
由人而成者也故悉類次之殿之以祥異者何察地以
明天以地始以天終而一篇之大綱定矣
一志必有目目分而綱得所統矣建置之目二曰城池曰
公署附之以驛站戍墩津梁計卷二職官之目二十有
六曰留守曰校尉曰尹曰參軍曰分司曰太守此設乎
古者也故先之曰道曰知府曰同知曰通判曰經歷曰

知縣曰縣丞曰主簿曰巡檢曰典史曰教授曰府訓導
曰教諭曰訓導曰提督曰叅將曰都司曰守備曰千把
總此設乎今者也故繼之曰名宦則統乎古今而書者
也故又繼之計卷七田賦之目六曰則壤曰成賦曰漕
運曰倉貯曰雜稅曰鹽引計卷一選舉之目六曰薦辟
曰進士曰舉人曰貢生曰武科曰封廕計卷六人物之
目十有四曰賢哲曰儒林曰道學曰名臣曰忠節曰文
苑曰武功曰政績曰孝義曰隱逸曰藝術曰仙釋曰流
寓曰列女計卷一十有七古蹟之目三十有六曰都邑
曰宮殿曰觀曰臺曰樓曰堂曰室曰苑囿曰園圃曰亭
曰館曰池曰軒曰菴曰宅里曰鄉曰聚曰坊曰街曰市
曰井曰書院曰溝渠曰關曰塞曰屯曰堡曰津渡曰橋
梁曰道路曰驛遞曰倉場曰庫藏曰壇廟曰陵墓曰寺
觀計卷二十有二藝文之目二十有二曰詔曰誥曰疏
曰表曰頌曰贊曰箴曰銘曰論曰議曰辨曰考曰書曰
跋曰序曰記曰傳曰神道碑曰墓表曰墓誌銘曰賦曰
詩計卷二十有九金石之目二曰石經曰碑刻計卷六
經籍之目四曰經曰史曰子曰集計卷四其他有綱統
之而不分目者曰山川計卷十曰輿圖曰沿革曰星土
曰疆域附保里形勝曰戶口曰禮俗附方言曰物產曰

祠祀曰學校曰帝紀附后妃藩封曰聖蹟曰祥異計卷各一共計一百一十六卷合上

聖製四卷統一百二十卷而目全而書備矣

一志必定例者便于省覽也蓋府統轄十邑有分縣而書之例有分時代而書之例如建置如職官如田賦如戶口如古蹟如金石之類以分縣爲例者也如選舉如人物如藝文如經籍如祥異之類以時代爲例者也然有一志之中旣以時代相次而忽變例分縣如選舉中之貢生人物中之列女此所謂省文以就例者也

一志必辨訛舊志有地名相同混入者如名宦中之蕭景

本梁書高祖從父弟爲永寧令政爲百城景永嘉太守范述曾榜郡門曰諸縣有疑滯者可就永寧令決是以永嘉之永寧論其人物中之溫堂云與朱文公同榜是以歛之新安譌且不思梁與南宋版圖所不能及者而混入之可乎至于唐之鄭谷以袁州之宜陽作河南之宜陽此不待辨而自明者也故悉去之

一志必正名如舊志列元聖於名宦宣聖於流寓舊志之舛焉夫二聖人德並天地萬古爲昭矣豈可與後世諸名人同類而並列耶然過化存神其蹟有不可泯者故別爲聖蹟志以尊崇之

一輿圖羨版章也河南山川爲古都會地圖書肇自三代
郊廓定于成周矧今日拱衛

神京四方作鎮凡道里之廣狹山勢之阨塞不有圖紀曷彰
厥後是用稽之往牒按之當今繪圖簡端庶三川之勝
指掌可得焉

一沿革歷代史志曰地理志曰州郡志曰地形志曰職方
考自漢以來乃有之秦以前則雜取諸紀載而曰見某
書其漢以後有正史志可據者則否或正史志不詳詳
於他書與詳於異代之史者亦曰見某書見某志至各
縣沿革上卽冠以郡沿革不別置者仿太史公以周冠
十一諸侯以周冠六國表例也

一星土以歲差而移歲差以周髀爲準近代自利瑪竇傳
西洋歷實周髀之學也陽城土圭爲周髀第一要義故
並附入

一山川脈絡支派非親歷不能詳舊志多沿襲舊聞有一
山而名稱不一以至二三見者有兩山而合爲一山者
至于水之源流隨其盈縮而書之不特與山經諸書不
合卽就土人而問之亦茫然也今志皆孫君枝榮躬爲
考訂窮巖絕壑無不親至庶幾爲茲郡山水開一生面
也

一山川表五山四水爲經山有位置水有源流仿山海經及水經先挈其綱乃徵諸書言山川者類紀于下又折以己意入按中敘山先幹後支支山或連數山敘支山完重接幹山敘水於細流入經流者曰注小經流入大經流者曰入細流幾與經流同者曰會昔有別名後合爲一者曰得其左右注者皆以方向別之凡紀山川自西而東遇交界于綱中提明或在兩縣界上山則曰界某某間水則曰某縣與某縣分水末復計經幾縣地行若干里以統紀之

一城池公署等類皆歸建置志中惟 文廟學宮爲文治

光昭之地况我

朝禮崇樂備隆於古昔追封從祀典莫重焉故仍爲學校志凡祭器樂章悉遵

大清會典詳書於內所謁觀其車服禮器以深高山仰止之思不僅別於他祀也書院社學亦以類從焉

一驛站戍堠橋梁志書每自爲一目今俱附入公署後蓋事同王政以類相及也至于有事蹟可徵者則俱見古蹟中不復重見

一志多抄賦役全書展卷目迷况良法隨時更定亦無事重衍茲志田賦戶口皆按各屬自乾隆三十六年編審

奏銷實數簡明分別依例注載庶一覽了然如欲因流溯源則有全書在可覆按也漕運倉貯鹽課以實

天庾而裕國用故例及之

一官必有蹟存其蹟以實其名不獨守令凡有蹟于茲土者得並列焉

一禮俗先徵禮經次及今俗俗有變禮而不失禮意者有似禮而實非禮者但主紀載不敢訾議志之體也然得失可考而知矣

一物產中土陰陽和會生殖繁盛但取有可徵引者登之非能備物聊資博雅至於山川原野咸闢賦歛土宜方物漸至稀少亦可以見昇平之樂矣

一方言雜徵諸書雅俗本不相遠間有不可解者以聲音求之有切有合有轉有轉合亦韻學之一端也

一壇廟之有歲祀邦典也有功德于茲土而以祠報焉然必現存者書之他若見之記載或非祀典所及而蹟猶存者入古蹟門茲不贅及至于鄉鎮雜廟無德可稱近於淫祠者悉刪之

一舊志選舉以薦辟爲首此古制也今雖間一舉行而曠典不廢故仍之次進士次舉貢次武科次襲廕封贈

一王者以孝治天下行慶攷績則一命以上皆得疏恩及

其所自出君恩重矣臣子之報于此益深匪但寵榮已也其可攷者悉具載之

一帝王當紀國史河南志乃識郡縣事也而書之行志者巨細必收微顯俱載體也今端士貞媛有一節之行且錄之况其大者乎此李濂通志例也若后妃出自里閭侔德配乾王化所關弗可遺也箴封亦天潢所推故類及之

一人物志有褒無貶昔伊川先生之言曰古者諸侯之國各有史故其善惡皆見乎後世自秦罷侯置守令則史亦從而廢今郡邑志亦史義也而非史裁史見善惡而志備眾體又非任史職可以舉一郡之秩官人材而進退之以故修史與修志義同而體異春秋善善長而惡惡短惟于書法未敢有濫辭

一舊志列鄉賢人物爲兩門第人物卽鄉之賢者也茲志人物旣各以類分其見于正史者悉錄之太長者稍節之至舊志及各邑志之一行一藝可採者亦附載之以發幽光以勸善類

一舊志人物之外獨標孝義一門而以忠節列女等附之殊乖義類蓋統而言之皆人物也茲志以人物爲綱首賢哲次儒林次道學次名臣次忠節次文苑次武功次

政績次孝義次隱逸次藝術次仙釋次流寓次列女不
惟便于省覽抑以徵川嶽之靈焉

一志體不爲生人立傳惟貞節已奉

旌表不問存歿皆照冊敘入卽年例已符無力請 旌已載
各邑志及續採訪來者概行收載以見

本朝風化之盛

一古蹟用備稽考河南天地之中爲帝王都邑遺蹟之多
甲于宇內舊志僅載名目及道里遠近而已茲志一一
考訂備詳源委無不次第類入至寺觀爲象教之始雖
不如伽藍記之後談亦考古者所不廢也故并附之

一古蹟都邑與沿革爲經緯但紀各縣沿革自秦漢置郡
縣後始詳而春秋地名在東都畿內尤多胥備于都邑
門中

一溝洫爲史志所錄河南在漢魏建都時引穀洛灌城其
渠竭水門水巷作法具備尤言水利者所必講用詳古
蹟溝渠門

一題名以備考稽故職官選舉俱載至本年止立傳必俟
久而論定故近者缺之以俟異時撰錄焉

一他志有以文章爲藝文者有以書目爲藝文者所見不
同遂至編輯亦異然二者不可偏廢惟分藝文經籍以

別之其實則同也蓋藝文因文見事經籍因書存人故並志之

一藝文詩賦之類必擇有關輿地山川人物足備稽覽者隨類附入其采錄亦同列傳之例

一經籍志列其書目姓氏史家藝文志例也然嫌其太略不見著述家苦心今特倣馬端臨通考晁氏讀書志例釐爲四部條分類析而並存之又各述其大指以見書之梗概惟是河南一郡爲類不備故四部中但以年代爲次而不更分細類

一災祥之志猶史家之有天官五行也洪範庶徵人事先之故雖微必錄然必徵之正史稗官野乘勿錄也

一舊志雜紀一門所載紀言紀事等類言以人傳事因時附其可傳不朽者已分見於各門之內復衍而贅之甚無謂也茲盡刪其類以祥異終焉

一豫省舊志如宋朱久道之河南志明邵二泉之許州志崔後渠之彰德府志李川甫之通志皆稱字內善本次道之志久已失傳而川甫之志幸有存者故凡爲郡中紀載者悉取材焉

一張志續修於雍正五年已在陝州直隸之後乃仍依舊志一體編載匪憚於更張卽愛不割錦且另續四卷文

非相屬亦不便考稽茲志凡陝屬舊文一概刪除

一志貴證據昔衛正叔作禮記集說曰他人著書惟恐不出于己予此編惟恐不出于人朱竹垞先生輯日下舊聞引以爲例此志亦倣爲之古蹟一門悉本載籍閩百詩所云人生千百年之後說千百年以上之事非書何所憑信乎至于近代人物有志傳可據者則書其或出于採訪者則書採訪事實以明所言之必有本也

一採錄諸書凡

頒立學宮暨

內府刊播者悉登之其有足備典故者雖小必載至違礙書

籍謹遵憲定書目概不採錄

一諱名之典原屬臣子尊君親上之意故凡遇

聖諱宜避忌者無不倍加謹慎

天顏咫尺不可不嚴也

一是志之修前守王公已聘英山進士金君序珽纂輯未

五月王公調守開封稿遂未成余膺

簡命來此自媿謏陋未易任其卒業適故鄉老友童君二樹應河南阿中丞修通志之聘遊屐尙羈梁園遂請主此席隄館于署東之雪香書院相去不數十步始得晨夕相商確邑貢生裴君希純孫君枝榮熟悉此郡掌故乃

邀同編次時多諮詢而山川情形足訂日考則孫君獨任之特書之以識其勞

一是書之成始于丙申之仲冬訖于己亥之仲春閱再歲而後成雖因實創與舊志迥然不同訂其譌謬補其缺畧迺采摭羣書自六經子史以至百家文集及天下志乘無不細加蒐討閱過書籍三萬餘卷覽者幸以舊志覆按之當知用心之良苦矣

知府會稽施誠我真氏識

河南府志重修姓氏

總裁

兵部侍郎都察院右副都御史巡撫河南兼提督節制倉庫兼理河道

徐績

兵部侍郎都察院右副都御史巡撫河南兼提督節制倉庫兼理河道

鄭大進

兵部侍郎都察院右副都御史巡撫河南兼提督節制倉庫兼理河道

陳輝祖

刑科給事中提督河南全省學政

邵庠曾

翰林院侍讀提督河南全省學政 王大鶴

鑒定

河南布政使司布政使 榮柱

河南按察使司按察使 鄭源璠

姓氏

署河南按察使司事分巡糧儲驛鹽道 赫爾敬阿

署河南按察使司事分巡歸陳許兼理河務兵備道 周於智

署河南按察使司事分巡彰衛懷三府兼管利河河務兵備道 朱岐

前任河南分巡河陝汝道 張永貴

河南分巡河陝汝道 張有年

纂修

河南府知府 施誠

總理

洛陽縣知縣 何如鐘

參訂

偃師縣知縣 汪瞻岷

鞏縣知縣 陳龍章

孟津縣知縣 王璞

宜陽縣知縣 周鈞

登封縣知縣 曾友伋

永寧縣知縣 丁光劍

新安縣知縣 彭維舉

澠池縣知縣 苗漪

嵩縣知縣 張珠

較訂

河南府教授 劉湜

河南府訓導 郭雨銘

分輯 恩 貢 生 裴希純

副 貢 生 孫枝榮

採訪 進 士 姚象謙

舉 人 李淑沆

拔 貢 生 曹營

廩 生 楊錦堂

庠 生 閻雨銘

庠 生 王榮緒

舉 人 王贊

舉 人 傅榮綿

廩 生 張德

監 生 呂公溥

監 生 屈秉忠

校閱 增 生 盧殿元

增 生 盧殿元

河南府志

姓氏同治六年補刊三

輿圖

沿革表

卷三

星土志

附土圭

卷四

疆域志

附保里形勝

卷五

建置志一

城池

卷六

建置志二

公署 附驛站

卷七

山川志一

卷八

山川志二

卷九

山川志三

卷十

山川志四

卷十一

山川志五

卷十二

山川志六

卷十三

山川志七

卷十四

山川志八

卷十五

山川志九

卷十六

山川志十

卷十七

職官志一

學尉尹 分司道

卷十八

職官志二

太守 知府 同知 推官 通判 經歷

卷十九

職官志三

知縣

卷二十

職官志四

縣丞 主簿 巡檢 典史

卷二十一

職官志五

卷二十二

職官志六

職官志五

教授 府訓導 教諭 訓導

職官志六

提督 都司

叅將 守備

卷二十三

卷二十四

職官志七

名宦

田賦志

則壤 成賦 倉貯 雜稅

漕運 鹽引

卷二十五

卷二十六

戶口志

禮俗志

附方言

卷二十七

卷二十八

物產志

祠祀志

卷二十九

卷三十

學校志

附書院 學田

選舉志一

薦府

卷三十一

卷三十二

選舉志二

選舉志三

卷三十三

卷三十四

選舉志四

貢生

選舉志五

武進士 武勳

武舉

卷三十五

卷三十六

選舉志六

封贈 磨襲 先賢世襲

帝紀

附后妃 藩封

卷三十七

卷三十八

聖蹟志

人物志一

賢哲

卷三十九

卷四十

人物志二

儒林

人物志三

道學

卷四十一

卷四十二

人物志四 各臣

人物志五 忠節

卷四十三

卷四十四

人物志六 文苑

人物志七 武功

卷四十五

卷四十六

人物志八 政績

人物志九 孝義

卷四十七

卷四十八

人物志十 隱逸

人物志十一 藝術

卷四十九

卷五十一

人物志十二 仙釋

人物志十三 流寓

卷五十二

卷五十二

人物志十四 列女

人物志十五 列女

卷五十三

卷五十四

人物志十六 列女

人物志十七 列女

卷五十五

卷五十六

古蹟志一 都邑 附城門

古蹟志二 都邑

卷五十七

卷五十八

古蹟志三 都邑

古蹟志四 都邑

卷五十九

卷六十

古蹟志五 宮殿一 附門闕

古蹟志六 宮殿二

卷六十一

卷六十二

古蹟志七 觀臺樓 古蹟志八 苑園

卷六十三 古蹟志九 亭軒齋 池古蹟志十 宅里

古蹟志十一 宅里 古蹟志十二 街鄉市聚坊

卷六十五 古蹟志十三 書院溝渠 古蹟志十四 關塞屯堡

古蹟志十五 津渡橋梁 古蹟志十六 道路倉場驛庫

卷六十七 古蹟志十七 壇廟 古蹟志十八 陵墓一

古蹟志十九 陵墓二 古蹟志二十 陵墓三

卷六十九 古蹟志二十一 寺觀一 古蹟志二十二 寺觀二

古蹟志二十三 寺觀三 古蹟志二十四 寺觀四

卷七十一 古蹟志二十五 寺觀五 古蹟志二十六 寺觀六

古蹟志二十七 寺觀七 古蹟志二十八 寺觀八

卷七十三 古蹟志二十九 寺觀九 古蹟志三十 寺觀十

古蹟志三十一 寺觀十一 古蹟志三十二 寺觀十二

卷七十五 古蹟志三十三 寺觀十三 古蹟志三十四 寺觀十四

古蹟志三十五 寺觀十五 古蹟志三十六 寺觀十六

卷七十七 古蹟志三十七 寺觀十七 古蹟志三十八 寺觀十八

古蹟志三十九 寺觀十九 古蹟志四十 寺觀二十

卷七十九 古蹟志四十一 寺觀二十一 古蹟志四十二 寺觀二十二

古蹟志四十三 寺觀二十三 古蹟志四十四 寺觀二十四

藝文志五 序一

卷八十三

藝文志七 記一

卷八十五

藝文志九 記二

卷八十七

藝文志十一 傳

卷八十九

藝文志十三 墓表

卷九十一

藝文志十五 墓誌銘一

卷九十三

藝文志十七 賦一

卷九十五

藝文志十九 賦三

卷九十七

藝文志二十一 誦諺

卷九十九

藝文志二十三 七古

卷一百一

卷一百一

藝文志六 序二

卷八十四

藝文志八 記二

卷八十六

藝文志十 記四

卷八十八

藝文志十二 神道碑

卷九十

藝文志十四 墓誌銘一

卷九十二

藝文志十六 墓誌銘二 附祭文

卷九十四

藝文志十八 賦二

卷九十六

藝文志二十 歌辭 附樂府

卷九十八

藝文志二十二 五古

卷一百

藝文志二十四 五律

卷一百二

卷一百二

藝文志二十五 七律

藝文志二十六 五絕

卷一百三

卷一百四

藝文志二十七 七絕

藝文志二十八 五排

卷一百五

卷一百六

藝文志二十九 七排

金石志一

卷一百七

卷一百八

金石志二

金石志三

卷一百九

卷一百十七

金石志四

金石志五

卷一百十一

卷一百十二

金石志六

經籍志

卷一百十三

卷一百十四

經籍志 史

經籍志 子

卷一百十五

卷一百十六

經籍志 集

祥異志

河南府志首卷之一

聖製

世祖章皇帝訓飭士子卧碑文

順治九年

朝廷建立學校選取生員免其丁糧厚以廩膳設學院學道學官以教之各衙門官以禮相待全要養成賢才以供朝廷之用諸生皆當上報國恩下立人品所有教條開列于後

- 一 生員之家父母賢智者子當受教父母愚魯或有非為者子既讀書明理當再三懇告使父母不陷于危亡
- 一 生員立志當學為忠臣清官書史所載忠清事蹟務須

互相講究凡利國愛民之事更宜留心

一生員居心忠厚正直讀書方有實用出仕必作良吏若心術邪刻讀書必無成就為官必取禍患行害人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入即有切己之事止許家人代告不許干預他人詞訟他人亦不許牽連生員作証

一為學當尊敬先生若講說皆須誠心聽受如有未明從容再問毋妄行辯難為師長者亦當盡心教訓勿致怠

惰

一軍民一切利病不許生員上書陳言如有一言建白以違制論黜革治罪

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

特恩蠲免河南租稅詔

順治十七年

自古帝王統御寰區綏安兆姓治效已臻則與天下共樂昇平化理未奏則先臣庶反身克責敬

天勤民道不越此朕荷

皇天眷佑纂承

祖宗弘緒夙夜兢兢力圖治安十有七年於茲乃民生尚未盡
遂貪吏尚未盡改滇黔雖入版圖而伏莽未靖征調猶繁
疾苦時告拯恤未周反覆思維皆朕不德負

上天之簡畀愧

祖宗之寄託虛

皇太后教育之恩孤四海萬民之望每懷及此罔敢即安茲於

順治十七年正月二十二二十二十三

日祭告

天地

社稷抒忱引咎自今以後元旦冬至壽節天下慶賀表章

皇太后前照常恭進朕前表章暫行停止特簡恩赦加惠元元

一順治十六年以前直省拖欠錢糧差廉幹滿官前往清
察果係拖欠在民者俱與蠲免如係官吏侵欺者不准
援赦濫及

一派徵錢糧俱照萬歷年間則例其天啟崇禎年間加增
盡行蠲免通行已久如有貪官汙吏例外私派多徵擾
民者該督撫按官糾參重處

聖祖仁皇帝蠲免河南等省錢糧上諭

康熙二十四年

朕維自古帝王統一寰區懋宣德化必子惠黎元勤求民

瘼俾幹止寧成家給人足而後世躋雍熙治登上理朕御極以來宵旰圖治未敢卽安念切民依思培邦本雖編氓漸得遂生而閭閻正資惠養欲使羣生樂利比戶豐盈惟頻行減賦蠲租庶萬姓得沾實惠前此用兵以來河南湖北兩省民人轉輸供億勞費繁多特沛仁恩以昭軫恤所有康熙二十五年應徵地丁各項錢糧着與蠲免一半其康熙二十四年未完地丁錢糧亦着盡與豁除又直隸獻縣河間縣河間衛江南宿遷縣興化縣邳州鹽城縣高郵州山東刻城縣魚臺縣地方今年重罹水災小民艱苦亦應加恩軫恤所有康熙二十四年下半年二十五年上半年地丁各項錢糧俱與豁免爾部速此該地方官速行曉諭務使人人均被恩膏以副朕愛育蒼生至意如有不肖有司官役借端朦混及私行重徵者該督撫指名題叅從重治罪如該督撫徇隱不行糾舉或經叅奏或被告發定行一併從重治罪爾部卽遵諭行特諭

特恩蠲免河南等省錢糧諭

康熙三十年

朕孜孜圖治軫切民依閭閻耕獲時勤諮訪其有以荒歉上聞者或蠲或賑旋卽施行務令得所念河南一省連歲秋成未獲豐稔非沛特恩蠲恤恐致生計艱難康熙三十一年錢糧着通行蠲免並漕糧亦著停徵至山西陝西被

灾州縣錢糧除照分數蠲免外其康熙三十一年春夏二季應徵錢糧俱各緩至秋季徵收用稱朕眷愛黎元撫綏休養至意爾部即遵諭行特諭

聖諭十六條

康熙三十年

敦孝弟以重人倫

篤宗族以昭雍睦

和鄉黨以息爭訟

重農桑以足衣食

尚節儉以惜財用

隆學校以端士習

黜異端以崇正學

講法律以儆愚頑

明禮讓以厚風俗

務本業以定民志

訓子弟以禁非為

息誣告以全善良

懲逃以免株連

完錢糧以省催科

獲保甲以弭盜賊

解讎忿以重身命

御製碑

康熙三十年

至聖先師孔子贊并序

蓋自三才建而天地不居其功一中傳而聖人代宣其蘊有行道之聖得位以綏猷有明道之聖立言以垂憲此正學所以常明人心所以不泯也粵稽往緒仰溯前徽堯舜禹湯文武達而在上兼君師之寄行道之聖人也孔子不得位窮而在下秉刪述之權明道之聖人也行道者勲業炳於一朝明道者教思周於百世堯舜文武之後不有孔

子則學術紛淆仁義湮塞斯道之失傳也久矣後之人而欲探二帝三王之心法以爲治國平天下之準其奚所取衷焉然則孔子之爲萬古一人也審矣朕巡省東國謁祀闕里景企滋深敬攜筆而爲之贊曰

清濁有氣剛柔有質聖人參之人極以立行著習察舍道莫由惟皇建極惟后綏猷作君作師垂統萬古曰惟堯舜禹湯文武五百餘歲至聖挺生聲金振玉集厥大成序書刪詩定禮正樂旣窮象繫亦嚴筆削上紹往緒下示來型道不終晦秩然大經百家紛紜殊途異趣日月無踰堯堦可居孔子之道惟中與庸此心此理千聖所同孔子之德仁義中正秉彜之好根本天性庶幾夙夜勗哉令圖邈源洙泗景躅唐虞載歷庭除式觀禮器攜毫仰贊心焉遐企百世而上以聖爲歸百世而下以聖爲師非師夫子惟師於道統天御世惟道爲寶泰山巖巖東海泱泱墻高萬仞夫子之堂孰窺其藩孰窺其徑道不遠人克念作聖

復聖顏子贊

聖道早聞天資獨粹約禮博文不遷不貳一善服膺萬德來萃能化而齊其樂一致禮樂四代治法兼備用行舍藏王佐之器

宗聖曾子贊

洙泗之傳魯以得之一貫曰唯聖學在茲明德新民止善
為期格致誠正均平以推至德要道百行所基纂承統緒
修明訓辭

述聖子思子贊

於穆天命道之大原靜養動察庸德庸言以育萬物以贊
乾坤九經三重大法是存篤恭慎獨成德之門卷之藏密
欽此

百世而贊

樹人既萎楊墨昌熾子輿闢之曰仁曰義性善獨闢知言
養氣道稱堯舜學屏功利皇煌七篇並垂六藝孔學攸傳

禹功作配

特恩通蠲直隸各省等處錢糧上諭

康熙五十年

朕誕膺大統撫育寰區夙夜孜孜不自暇逸凡以為民也
勤圖利濟休養生全即無水旱之虞時布寬仁之政蠲租
除賦務使遐方率土無不均濡或值雨暘偶愆出帑發粟
多方賑恤其有益於吾民者靡弗備舉而亟行之以昭朕
愍懇周詳之至意前因十九年所頒諭旨申晰甚明原欲
將五十年天下錢糧通行蠲免以諸臣集議恐需用兵餉
撥解之際兵民騷遞益致煩苦故自五十年為始三年之
內全免一週除將直隸奉天等九省康熙五十年地丁錢

糧一概蠲免及歷年舊欠錢糧一并免徵外山西河南陝西甘肅湖北湖南各撫屬除漕項外五十一年應徵地畝銀共八百四十萬四千兩有奇人丁銀共一百二十萬八千一百兩有奇着察明全免並歷年舊欠共五十四萬二千三百兩有奇亦俱着免徵其五十二年應蠲省分至期候旨行民間舊欠既經豁免嗣後每年額徵錢糧務如數全完倘完不及額或有虧空托稱民欠卽責令督撫以下官員償補仍從重治罪該督撫須實心力行期副朕惓惓愛民之意如有指稱事故侵欺科派事發之日必嚴行究治諭旨到日遍示城郭鄉村深山窮谷咸使知悉爾部卽

遵諭行特諭

雍正元年

世宗憲皇帝上諭

諭知府國家親民之官莫先於守令蓋州縣官與民最親而知府又與州縣官最親凡州縣興利除弊之事皆於知府有專責焉是知府一官分寄督撫監司之耳目而爲州牧縣令之表率承流於上宣化於下所繫綦重矣漢宣帝有曰太守吏民之本也又曰庶民所以安其田里而無歎息愁恨之心者政平訟理也與我共此者其惟良二千石乎故兩漢循良稱盛而賢守尤多龔黃召杜諸人大都皆廉潔和平正身率屬以與民休養生息史稱其所居民富所

去民思此皆彰明較著者也

皇考澄肅官方慎簡僚吏知府中有政績茂異聲名著聞者必加優眷數年之間卽膺殊擢所以鼓勵循良務令羣黎受福爾等蒙

皇考簡用之恩受國家民社之寄地方不甚遼遠則於民間之疾苦可以周知勢分不甚懸殊則於屬下之賢否可以洞悉爾果廉正自持屏絕賄賂則督撫監司必不致肆行需索而州牧縣令亦不敢恣意貪婪近聞州縣火耗任意加增罔知顧忌以小民之脂膏飽貪吏之谿壑由爾不能却遺金於暮夜又安能禁屬吏之監征乎盤查倉庫必須覈實不可視爲故事乃或借盤查之名勒索餽遺是因盤查而虧空愈甚矣爾能時勤勸誡加以體恤則州縣可無虧空之虞能制節謹度淡泊是安則爾亦可免虧空之累勸農課桑以厚風俗禁戢強暴以安善良平情聽斷以清獄訟皆爾職守之所當盡者至於督撫舉劾州縣必由爾之詳揭務須秉公持正勿涉偏私若善於逢迎者從而庇護薦拔之而端方恬靜之人反故爲摧抑下吏皆苟且營私以求容悅地方之事尚可問乎居官者每有初入仕途清操自矢漸登華要頓改初心旣知砥礪廉隅卽當始終一節更有巧於仕宦者人每謂其名實兼收朕最不解此語

夫名者實之華果能潔已愛民奉公盡職此所謂實也治
 行稱首民歌興頌此所謂名也實至而名隨之如本立而
 華茂焉若弋取虛譽為名而以封殖多藏為實此則小人
 之尤更甚於貪黷彰聞之輩矣朕纘承大統夙夜祗懼惟
 恐有負

皇考付託之重深冀爾等各體此意精白乃心以古循良自勉
 若徇私納賄不能率屬愛民貽害地方蔑視憲典三尺具
 在朕不能為爾等寬也特諭

諭知州知縣朕惟國家首重吏治爾州牧縣令乃親民之官

吏治之始基也貢賦獄訟爾實司之品秩雖卑職任綦重
 官賢則民先受其利州縣官不肖則民先受其害庸

式任者當體

慮養元元之意以愛民為先務周察部屋綏輯鄉里治
 行果有其實循卓自有其名非內聚賄而外干譽謂之名
 實兼收也全自吏治如作室然督撫其棟梁也司道其垣
 宇用什凡民壙也州縣其基址也書云民惟邦本本固邦寧夫所以固
 邦本者在吏治而吏治之本在州縣苟州縣之品行不端
 猶基不立則室不固庸有濟乎

考臨御六十一年灼知州縣之重特行引見咨詢明試至詳
 至慎其有廉能之員每不次超擢以示鼓勵今海內羣黎

皆

皇考所懷保也朕膺

皇考之治功惟爾州縣諸臣具有父母斯民之責其爲朕立之
基址以固邦本焉誠能潔己奉公實心盡職一州一縣之
中興仁興讓教孝教忠物阜民安刑清訟簡朕將升之朝
寧用作股肱如或罔念民瘼恣意貪婪或朘削肥家或濫
刑逞虐或借刻以爲清或恃才而多事或諂媚上司以貪
位或有吏以擾民或徇私逞欲以上虧國帑王章具
在豈爾貸歟更有任州縣時私肥已橐而漫云且俟顯要
方立名節者其與初市清名晚而改操之人何以異哉至
於錢糧關係尤重絲毫顆粒皆百姓之脂膏增一分則民
受一分之累減一分則民沾一分之澤前有請暫加火耗
抵補虧空帑項者

皇考示諭在廷不允其請爾諸臣共聞之矣今州縣火耗任意
加增視爲成例民何以堪乎嗣後斷宜禁止或被上司察
核或被科道糾叅必從重治罪決不寬貸夫欲清虧空之
源莫如節儉正直節儉則用無不足正直則上官不可干
以私若賤小民之生以飽上官之貪欲冒不測之罪以快
一時之奢侈豈砥礪廉隅爲民父母之道乎爾州縣等官
其恪共乃職勿貽罪戾毋謂地遠官卑朕不及察其賢否

也特諭

諭訓飭士子碑

雍正四年

家建立學校原以興行教化作育人材典至渥也朕臨御
感慕隆重師儒加意庠序近復慎簡學使釐剔弊端務期
汰陋修明賢才蔚起庶幾樸棧作人之意乃比年士習未
賦儒效罕著雖因內外臣工奉行未能盡善亦由爾諸生
積錮已久粹難改易之故也茲特親製訓言再加警飭爾
諸生其敬聽之從來學者先立品行次及文學學術事功
源委有敘爾諸生幼聞庭訓長列宮牆朝夕誦讀寧無講
究必也躬修實踐砥礪廉隅敦孝順以事親秉忠貞以立
志窮經考業勿雜荒誕之談取友親師悉化驕盈之氣文
章歸於醇雅毋事浮華軌度式於規繩最防蕩軼子衿佻
達自昔所譏苟行止有虧雖讀書何益若夫宅心不淑行
已多愆或蜚語流言脅制官長或憑糧包訟出入公門或
受撥姦猾欺孤凌弱或招呼朋類結社邀盟乃如之人名
教不容鄉黨不齒縱幸脫褫扑濫竊章縫返之於衷寧無
愧乎况鄉會科名乃掄才大典關係尤鉅士子果有實學
何患困不逢年顧乃標榜虛名暗通聲氣夤緣詭遇罔顧
身家又或改竄鄉貫希圖進取巽謫騰沸網利營私種種
弊端深可痛恨且夫士子出身之始尤貴以正若茲厥初

拜獻便已作姦犯科則異時敗檢踰閑何所不至又安望其秉公持正爲國家宣猷樹績膺後先疏附之選哉朕用嘉惠爾等故不禁反復惓惓茲訓言頒到爾等務共體朕心恪遵名訓一切痛加改省爭自濯磨積行勤學以圖上進國家三年登造束帛弓旌不特爾身有榮卽爾祖父亦增光寵矣逢時得志寧俟他求哉若仍視爲具文玩愒勿傲毀方躍冶暴棄自甘則是爾等冥頑無知終不能率教也旣員栽培復干咎戾王章具在朕亦不能爲爾等寬矣自茲以往內而國學外而直省鄉校凡學臣師長皆有司鐸之責者並宜傳集諸生多方董勸以副朕懷否則職業勿修咎亦難逭勿謂朕言之不預也爾多士尚敬聽之哉

恩賞義民翟世有頂帶銀兩諭

雍正六年

據河東總督田文鏡奏摺內稱河南府孟津縣天平街住民翟世有以耕種爲業雍正六年四月初三日有陝西三原縣人秦泰販買綿花携銀一百七十兩遺失在路翟世有赴地耕作見而拾獲欲俟原主尋找給還守候一日及歸告知伊妻徐氏徐氏亦勸夫給還至次日始見秦泰招帖遂報明鄉地將原銀給與絲毫不取秦泰因招帖原有均分之約且感其恩惠欲踐約酬謝而翟世有固辭不受似此義舉清操實爲難覯已經給匾賞銀并飭縣立碑以

示獎勵謹具摺奏聞等語夫天下之治平在乎端風俗而風俗之整理在乎正人心倘人之存心果能守法奉公安分知足則不貪苟得之財不爲非理之事衾影無愧俯仰寬舒而和氣致祥自然災害潛消諸福畢至子孫並獲安享所謂積善之家必有餘慶也若存心不端曖昧苟且損人利己巧取貪求雖獲目前之微利而違背天理暗中必遭天譴得此失彼不足補償又或心存妄想輕棄鄉閭以致困苦饑寒迫爲匪事或身填溝壑或干犯刑章子孫流惡莫歸故土所謂積不善之家必有餘殃也古訓昭垂確

恩賞

不爽朕愛養黎元教誨諄諄至詳且悉惟期薄海內外

草薄從忠以成蕩平正直之治而地方大吏有司等旣不能躬行禮讓以爲民之倡復不能懇切周詳以宣朕之訓是以還淳返樸之風不多概見朕心實企望之今見孟津翟世有之事乃風俗轉移之明徵國家實在之祥瑞也朕心深爲嘉悅田文鏡化導獎勸之功亦於此可見蓋秉彜好德人心所同十室之邑必有忠信宇宙之大兆民之廣豈無崇廉尚義之人祇以大吏有司不以民風淳薄爲念或遂至於湮沒不彰而果能化導訓迪於平時而遇忠孝節義之人必敬禮表揚以爲衆人之勸則奮發興起豈不成比戶可封之俗乎翟世有著給與七品頂帶仍賞銀一

百兩以旌其善凡人境遇之豐嗇貧富皆有一定之數不可以倖而致假若貪者有餘而廉者不足則是定數不足憑而天道不可問矣有是理乎無奈世人貪心一萌遂以明白淺顯之理不能知覺而見利思義不拾遺金便爲古今罕覩之事如翟世有者乃耕田力作之農民耳未必備讀先聖之詩書取法古人之行誼而天性樸誠不欺暗室用能化導其妻共成義舉是以神明默佑揚表芳徽令聞達於朝廷拜章服帑金之賜且將揚名於史冊流譽於無窮倘但計一時之利所得不過百餘金爲數幾何用輒易罄以今日之榮名較之其多寡豈啻霄壤之分哉觀翟世

有之一節必其平日存心忠厚正直公平是以上蒙天鑒錫茲美事倘人人觀感興起皆能如此存心則不但成讓路讓畔之休風而本人亦必受上蒼之嘉祐荷國家之恩榮詎不美歟上年京城內有鋤草夫役名六十一者於伊草內拾得銀五十兩不肯私取當官呈出隨經該管官員奏聞朕已降旨獎賞此事與翟世有之還金相類翟世有六十一皆齊民也而能戒貪知足砥礪廉隅彼居官者身列縉紳羣黎賴其表率爲士者名標庠序百姓奉爲楷模而乃暮夜餽貽婪贓納賄公門出入網利營私不守官箴不端士品今聞翟世有六十一之事其能無愧於心乎朕

爲人心風俗起見特將田文鏡奏摺發出頒此諭旨着內外地方官員通行曉諭所屬官民人等知之

特恩蠲免河南錢糧諭

雍正七年

總督田文鏡公忠歷練自涖任豫省以來撫綏化導以實政實心爲察吏安民之本是以風清弊肅吏畏民懷地方舒暢之氣感召

天和數年之中年穀悉登豐稔該督之功實爲可嘉兼該省紳士庶民風俗向來醇樸又能遵封疆大臣之教人人向義輸忠以受

上天之恩實可謂良民矣夫因荒歉而蠲免正賦者乃賑窮恤

困之意若羣黎共敦善行以迓

天庥屢歲有秋災禮不作則賞善旌良朕之加恩沛澤更爲愉快着將豫省雍正七年額徵錢糧蠲免四十萬兩總督田文鏡可確查分數通行所屬州縣一體遵奉使閭閻均沾實惠朕廣收人材以資吏治每年保舉引見之時覺豫省之人較少大約豫省士風器量謹厚有餘而才具明通不足今欲加以策勵以備國家政事之用着田文鏡通行所屬府州縣選其才猷可供任使者不拘人數資格秉公舉出該督再加遴選具題奏聞送部引見又念中州之民務本力田勤於耕作書經曰若農服田力穡乃亦有秋正今

日豫省之謂也着該督於常例歲舉老農外再令所屬每處各舉一人給以八品頂帶以示優獎並將朕旨曉諭遠鄉僻壤之民共知之特諭

特恩捐河南地丁錢糧四十萬兩上諭

雍正十一年

據河南署撫孫國璽奏報豫省歷年耗羨銀兩除本地公事支用外現存司庫銀七十萬兩有零又社倉存貯穀麥等項共計二十八萬石有零等語此皆原任總督田文鏡在任多年殫心經理之所儲蓄者從前提解耗羨之時本是澄清吏治體養民生之意屢降旨此項出自民間若本地公用充裕之時朕仍當加恩本地官民使之霑被惠澤

不令歸入公帑也今豫省存貯耗羨既有七十萬兩之多而該省官員等每年所得養廉又已敷用無須再為增添正當加惠閭閻俾令邀恩於格外着將河南本年地丁錢糧蠲免四十萬兩即以存貯之耗羨銀照數撥補還項該督王士俊可督率有司敬謹奉行使豫民均霑實惠大凡耗羨多餘之省該督撫藩司等往往不甚愛惜隨數用去並不為百姓計而存撙節之心卽如晉省巡撫養廉每年至三萬兩藩司至一萬五千兩皆相沿以為固然若伊等留意民生諸凡早為節省則儲蓄充盈亦可為加惠編氓之助矣特諭

特恩寬免以前積欠錢糧上諭 雍正十三年

上諭各省民欠錢糧十年以上者已於恩詔內概予蠲免其餘未完民欠尚係應徵者朕思繼緒方初惟當繼述我

皇考惠養黎元之至意俾服疇力穡之人均沐恩膏積逋全釋若未蠲之項尚事徵收民間不無煩擾茲特再行降旨於恩詔外將雍正十二年以前各省錢糧實欠在民者一併寬免從前江南積欠錢糧內曾有官侵吏蝕二項乃從民欠中分出者比時差往大臣官員辦理原不妥協亦著照民欠例寬免此朕仰體

皇考誠求保赤之仁深願吾民厚生正德之意各省軍民人等身受國恩至渥自應感動天良屏除陋習明守法奉公之大義循則壤成賦之常經共為良民免追呼之擾累倘疲玩性成不知悛改則是吾民中最為愚頑之人既無畏威之念亦鮮懷德之心國法具在朕亦不能為之寬貸也爾等即交部遵行欽此

恩定分數徵收以為各官養廉上諭 雍正十三年

上諭向來州縣徵收錢糧因銀色有傾銷之耗折解送有路途之盤費故於正項之外徵收耗羨原無定額其廉潔者尚知自愛不肖者任意徵求而督撫以至道府等員於中收受節禮陋規互相容隱弊難究詰嗣經巡撫諾敏田文

鏡倡爲提解歸公之法各該督撫就本省情形酌定分數徵收以爲各官養廉及地方分事之用除所定分數外中毫不許濫徵蓋以耗羨原屬額外之項與其聽地方官各行徵取不如明定分數使有節制不敢違越也然在未提解以前尚爲私項既提解以後或恐不肖官員視同正課又得於耗羨之外巧取殃民從前

皇考洞見流弊屢降諭旨欲俟將來虧空全清府庫充裕之日漸減漸草

聖心厪念未或忘之朕紹承大統念切民依孜孜軫恤日與王大臣等悉心籌畫期使吾民於正項之外絲毫無擾而一時勢有未能尚須從容計議惟是提解耗羨之法行之已十有餘年恐日久弊生奸吏夤緣剝耗外加耗重困閭閻不可不爲深慮著各該督撫嚴飭有司咸體朕意知耗羨一項可減而決不可增可於額內從寬而斷不可於額外多索倘於所定分數之外或又借估色或又借添戩爲名多取絲毫者該督撫卽行題叅重治其罪倘督撫徇隱不舉或經科道糾叅定將該督撫等一并嚴加議處再各省耗羨分數率在加一上下然江南賦重之區如蘇松常鎮四府額賦較之他省幾及數倍雍正六年以前每兩加耗僅止五分雍正六年以後增至加一且有司又復巧取

苛索民何以堪其令江南督撫詳加酌定量減分數徵收
不得仍前重耗困民倘敢陽奉陰違朕必於該督撫是問
特諭

特恩蠲免錢糧分惠佃戶上諭

雍正十三年

上諭朕臨御以來加惠元元將雍正十二年以前各省民欠
錢糧悉行寬免誠以民爲邦本治天下之道莫先於愛民
愛民之道以減賦蠲租爲首務也惟是輸納錢糧多由業
戶則蠲免之典大概業戶邀恩者居多彼無業貧民終歲
勤動按產輸糧未被國家之恩澤尚非公溥之義若欲照
所蠲之數履畝除租繩以官法則勢有不能徒滋紛擾然
業戶受朕惠者十苟捐其五分惠佃戶亦未爲不可近聞
江南已有嚮義樂輸之業戶情愿蠲免佃戶之租者閭閻
興仁讓之風朕實加悅其命所在有司善爲勸諭各業戶
酌量寬減彼佃戶之租不必限定分數使耕作窮民有餘
糧以贍妻子若有素封業戶能善體此意加惠佃戶者則
酌量獎賞之其不愿者聽之亦不得勉強從事此非捐修
公項可比有司當善體朕意虛心開導以興仁讓而均惠
澤若彼刁頑佃戶藉此觀望遷延則仍治以抗租之罪朕
視天下業戶佃戶皆吾赤子恩欲其均也業戶沾朕之恩
佃戶又得拜業戶之惠則君民一心彼此體恤以人和感

召

天和行見風雨以時屢豐可慶矣特諭

特恩整飭書院成就人才上諭

乾隆元年

上諭書院之制所以導進人才廣學校所不及我

世宗憲皇帝命設之省會發帑金以資膏火恩意至渥也古者鄉學之秀始升於國然其時諸侯之國皆有學今府州縣學並建而無遞升之法國子監雖設於京師而道里遙遠四方之士不能胥會則書院卽古侯國之學也居講席者固宜老成宿望而從遊之士亦必立品勤學爭自濯磨聞相觀而善庶人才成就足備朝廷任使不負教育之意若僅攻舉業已爲儒者末務况藉爲聲氣之資游揚之具內無益於身心外無補於民物卽降而求文章成名足希古之立言者亦不多得寧養士之初指卽該部卽行文各省督撫學政凡書院之長必選經明行修足爲多士模範者以禮聘請負笈生徒必擇鄉里秀異沉潛學問者肄業其中恃才放誕佻達不羈之士不得濫入書院中酌倣朱子白鹿洞規條立之儀節以檢束其身心倣分年讀書法予之程課使貫通乎經史有不率教者則擯斥勿留學臣三年任滿諮訪考檢如果教術可觀人才興起各加獎勵六年之後著有成效奏請酌量議敘諸生中才器尤異者准

令薦舉一二以示鼓舞特諭

特恩蠲免直省應徵錢糧上諭乾隆十年

上諭我朝

列聖相承深仁厚澤無時不加意培養元元以期家給人足百年以來薄海內外物阜民康共享昇平之福朕臨御天下十年於茲撫育蒸黎民依念切躬行儉約薄賦輕徭孜孜於保治之謨不敢稍有暇逸常守節用愛人之訓凡以爲民也今寰宇敕寧旣鮮糜費之端亦無兵役之耗所有解部錢糧原爲八旗官兵及京員俸餉之所共需計其所給較宋時養兵之費猶不及十之一二至於各處工程爲民之舉者亦祇取給於存公銀兩卽朕偶有巡幸賞賚所頒亦屬無幾是以帑藏尚有餘積數年來直省偶有水旱朕加恩賑濟多在常格之外如前年江南被水撫綏安插計費帑金千餘萬兩凡此皆因災傷補救而沛恩澤者朕思海宇乂安民氣和樂持盈保泰莫先於足民况天下之財止有此數不聚於上卽散於下仰惟我

皇祖在位六十一年蠲租賜復之詔史不絕書又曾特頒

恩旨將天下錢糧普免一次我

皇考肝食宵衣勤求民瘼無日不下減賦寬徵之令如甘肅一省全行豁免者十有餘年此中外所共知者朕以繼志述

事之心際重熙累洽之候欲使海澨山陬一民一物無不均沾大澤爲是特降諭旨將乾隆丙寅年直省應徵錢糧通行蠲免其如何辦理之處着大學士會同該部卽速定議具奏欽此

特恩蠲免耗羨錢糧上諭

乾隆十一年

上諭朕愛育黎元格外加恩將各省錢糧普免一次以爲休養萬民之計經大臣等酌議國家每年一定之經費皆取資於正賦應將各省分作三年蠲免則經費有賴而先後之間萬民均沾膏澤至於耗羨乃有司養廉及辦理公務之所必需應令照舊輸納朕已允行今思朕之逾格蠲免

天下正賦者所以藏富於民且使閭閻之間終歲不聞催科之聲也今正賦旣蠲而耗羨又令完納是官民仍有交關猶不免追呼之擾不若將蠲賦之年應徵耗羨一併緩至開徵年按數完納使小民於交關之日完此些須不必兩次伺候于公庭亦體恤民情之意着該部卽遵諭行並將公用不敷之處作何撥抵酌議辦理各省督撫當董率有司善爲之勿因此又別生弊端也欽此

巡幸嵩洛加恩蠲免錢糧上諭

乾隆十五年

上諭朕巡幸嵩洛一切供頓皆動用正項絲毫不以累民惟念安營除道未免有資民力直隸所經之地現已降旨照

例蠲除所有河南經過地方着加恩蠲免錢糧十分之三該部卽遵諭辦理務使小民得沾實惠欽此

巡幸河南全免丁地錢糧上諭

乾隆十五年

上諭朕此次巡幸河南省方問俗所至推恩尤念祥符爲省會之區登封實望秩之所鑾輿駐蹕宜沛優施着將該二縣乾隆辛未年應徵丁地錢糧全行蠲免俾愷澤均沾以愜小民近光之願該部卽遵諭行欽此

臨幸河南優恤高年上諭

乾隆十五年

上諭朕臨幸河南蠲租肆赦業經次第舉行而優恤高年亦應一體加恩着督撫查明經過州縣內男婦年七十以上者照前恩詔之例分別賞賚欽此

時巡方岳加恩辦差各官上諭

乾隆十五年

上諭朕時巡方岳經過地方所有承辦差務各官宜一體加恩着該督撫查明直隸河南二省各該地方辦差文武官弁內凡有罰俸住俸降級之案俱准其開復其無此等叅罰案件者咨部各加一級欽此

巡幸河南給還樂輸上諭

乾隆十五年

上諭據巡撫鄂容安奏稱恭遇駕幸河南通省紳民感沐皇仁無由仰報情願捐輸共收銀五十八萬七千餘兩以充公用等語朕時巡方岳一應道路橋梁等費皆准開銷正

項從無絲毫累民之事卽城垣祠廟有應黜聖灑掃畧爲
整葺者祇宜動支帑項卽其間或有開銷不到之處現經
賞給該省公項銀兩以資通融辦理之用曾何藉於輸將
鄂容安此奏甚屬錯悞因其據實陳明尚不至蹈欺隱之
咎猶可稍寬但朕省方問俗勤恤民隱尚慮休助之弗周
豈容供用轉資於下鄂容安不能仰副朕意殊失政體著
傳旨嚴行申飭所有紳民樂輸之項俱着給還摺並發欽
此

上諭據鄂容安摺奏豫省紳民因翠華臨幸情願効力輸工
銀兩實屬子來至願如復行給還非特不肯領回且頭緒
紛繁難免胥吏中飽懇請聽其所願至辦理之初並未具
奏實屬錯謬伏乞嚴治臣罪等語朕巡方問俗蠲復頻仍
惟慮德意未能徧逮一切供頓絲毫不以累民前降諭旨
甚明鄂容安惟知下情踴躍輸將據實冒昧從事本應嚴
行治罪但旣經據實陳奏究與有心欺隱者有間情尚可
寬且以陸續輸工之項復令紛紛具領恐奸胥猾吏從中
舞弊轉以飽其慾壑此語亦頗近是則給還之事實屬勢
所難行然地方官或辦理失宜欵項無憑稽覈以閭閻尊
君親上之忱適足資其糜費侵用是又始終不能仰體朕
意獲罪尤甚者矣著鄂容安將所有蠲輸銀兩實在作何

辦公之處詳悉查明繕冊送軍機處逐一察核毋得稍有濛混欽此

上諭朕頻歲巡幸直省問俗觀風一遵

祖制入疆考績既足利益民生而扈從官兵亦得練習勤勞修

明紀律所關甚鉅也所有行營供頓悉出內帑絲毫不以擾民道路橋梁原准開銷正欵且更特賜公項俾通融協濟該督撫等量力措辦儘足敷用卽或大員俸入旣豐稍効忱悃尚非必不可行之事從未有出於指派紳民者今歲時巡豫省所司辦理非該撫等及二三大員力所能供因逐日召進藩臬道府等隨事詢察伊等奏對之間皆有畏首畏尾之意朕知其辦理不善詢之該撫而鄂容安初尚欲含糊了事及加嚴詰乃一一據實奏明出自通省士民捐輸朕本欲卽治其罪念伊父大學士鄂爾泰宣勞有素伊在巡撫任內二年以來頗改其好名舊習而諸事屢勉出力且因朕問亦卽行據實奏明尚與始終欺隱者有間是以降旨切責姑免其交部議處至於富明身任藩司與該撫公同辦理乃於朕回鑾日援照三年期滿之例奏請來京陛見朕當卽降旨伊於行在屢經召對不應遽請陛見顯係取巧乖張交部察議且明知其非出於糊塗拘泥必因見朕深責鄂容安故爲此奏如准其來京遂得於

召見時乘機卸責其巧獍居心殊不可問令軍機大臣等傳旨申飭富明令其明白回奏今回奏摺內果稱諸凡與撫臣會同商酌並無異議是鄂容安辦理此事竟爲富明所賣不能逃朕洞鑒矣富明已照部議降調朕在中州時見該撫不能仰體朕心冒昧辦理恐江浙督撫等聞風效尤將以觀風布澤之盛典轉成地方官科歛累民之私計因卽遣兆惠等由開封馳至江浙宣布朕意俾督撫知所儆誠今兆惠回京覆奏江浙督撫並無派累朕心稍釋朕爲海內蒼黎蠲免正供至數千萬尚所不惜豈因省方盛舉轉惜多費數十萬金而乃需民捐輸耶卽謂感恩趨事實出羣情所願而農民非富商可比該督撫亦應明諭朕旨永行禁止方爲知輕重之大臣豈可因循從事着將朕在中州訓飭鄂容安并因富明前奏傳諭鄂容安各諭旨宣示中外俾共知朕意科道等惟以摭拾陳言及枚舉細故爲盡職似此有關政體之事何不叅奏著通行申飭朕已明頒諭旨亦不必再行竇奏欽此

特恩蠲免漕糧上諭

乾隆三十一年

上諭朕統御萬方孜孜求治惟以愛育黎元爲念自御極以來蠲賜所逮不下千億萬乾隆十年曾恭依

皇祖普免直省錢糧恩例蠲免天下額徵正賦二千八百萬有

奇期斯民家給人足咸臻樂利惟歲運漕米向以供給兵
餉廩糈之用非水旱特蠲例不普免夫八政以食為先閭
閻蓋藏尤資饒裕恭閱

皇祖實錄康熙三十年

特頒恩旨將各省起運漕糧通行蠲免一週大澤均沾慶逾常
格仰惟

皇祖冲齡踐祚臨御之三十年春秋未及四十朕年二十有五
始登大寶膺禋受祉迄今亦閱三十年際重熙累洽之會
必世昌期均符泰運其為慶幸倍深茲荷蒙

上天眷佑

列聖鴻庥函夏謐寧疆宇式闢北庭西域一萬餘里咸隸版圖
外有耕屯之獲內無餽餉之勞且連歲年穀順成庶物豐
殖京通倉貯儘有餘粟

天既誕貽樂歲惠洽昇平朕自當仰體
天心以推恩黎庶是用敬承嘉貺懋繼

前謨使薄海億兆並裕倉箱之慶所有湖廣江西浙江江蘇安
徽河南山東應輸漕米着照康熙年間之例於乾隆三十
一年為始按年分省通行蠲免一次其江寧京口杭州荆
州等處駐防地方該省漕米既蠲所有估需兵食如何預
為籌辦並各該省蠲免次第應行酌辦各事宜着該部速

行定議具奏欽此

特恩蠲免漕糧折色上諭

乾隆三十一年

上諭前經降旨將各省漕糧分年普免一次期使海宇黎元均霑闔澤但聞漕糧欵內尚有例徵折色及民戶等銀官爲辦漕者雖徵收銀米不同其爲按田起漕之例則一也若仍令其照漕項一例輸將不得與交納本色民戶并邀曠典未免獨切向隅着再申諭辦漕各省州縣內有徵收折色者一體概予蠲免督撫等務董率所屬實力經理再行明白曉諭毋使胥吏藉名滋弊副朕嘉惠閭閻普施膏渥至意該部遵諭速行欽此

恩准阿思哈奏請康基淵開渠水利上諭

乾隆三十一年

上諭阿思哈奏嵩縣知縣康基淵開渠灌田著有成效經該道府親勘屬實批司記功以示獎勵一摺州縣爲親民之吏於地方農田水利等事果能實心經理俾益民生實爲吏治首務今該縣康基淵挑濬伊河兩旁古渠并山澗諸流可資引導者一律疏治深通灌田六萬二千餘畝洵宗尙實政留心民事之員僅予記功不足以示鼓勵康基淵著交部議敘但有司承辦此等事務期在誠心爲民其所經畫溝洫畦塍必須確有界蹟可指豐收果有成效及該上司履勘相符方足表循緒而膺錄敘若牧令等因有此

旨妄生冀幸遂爾粉飾沽名虛文塞責於閭閻休戚毫無裨補甚或辦理不善紛擾更張則名為興利而轉以滋累又不可不防其流弊惟在各督撫覈實體察以為課最耳將此通諭知之欽此

特恩蠲免錢糧佃戶均沾惠澤上諭 乾隆三十二年

上諭前于乾隆十一年通行蠲免直省應徵錢糧曾令各督撫轉飭州縣官勸諭有田之家酌減佃戶租糧使之均沾惠澤上年春初朕特沛恩施降旨各省起運漕糧分年蠲免一週俾薄海農疇共叨樂利在有田業戶於輸蠲漕米之年已得倍裕蓋藏而佃戶等尚求一體仰邀曠典着各省督撫屆屆輸蠲免年分通行曉諭各業戶等照每畝應蠲漕米數內亦令佃戶免交一半務期愷澤均敷使納糧力穡之人倉箱並資盈阜該部遵諭即行欽此

特恩普免天下錢糧上諭 乾隆四十二年正月

上諭前因

聖母萬壽持宏錫類之仁普蠲各直省錢糧以昭慶惠朕本欲俟恭祝

聖母九旬萬壽之年再溥恩施一次茲者

仙馭升遐此後更無可推廣

慈仁之處現在部庫帑項又積至七千餘萬著再加恩自戊戌

年爲始普蠲天下錢糧仍分三年輸免俾寰宇億兆人民仍得共被

慈恩永申感慕而朕終天罔極之忱雖不能仰酌萬一庶幾藉茲稍展其如何輸派年分着戶部卽速悉心核奏遵行欽此

特恩運陝西麥石撫卹上諭

乾隆四十三年四月

上諭本年河南省因春雨短少恐麥收不無歉薄業經疊降恩旨倍加撫卹因思直隸山東兩省春膏亦未深透未必能接濟河南而陝西省昨據畢沅奏稱自二月以至三月屢得透雨遠近普沾是該省麥收自必豐稔陝西與河南接壤且有黃河一水可通若令陝西採買麥石運赴河南以濟民食則市糧卽可充裕且該省殷實之戶自不致囤積居奇勢必爭先出糶豫省市價自可漸平此事着交畢沅鄭大進彼此會商妥辦如果能以陝省之有餘補河南之不足于民間生計大有裨益將此由四百里傳諭畢沅等知之並將如何會辦情形一面辦理一面迅速覆奏欽此

特恩先行蠲免豫省錢糧上諭

乾隆四十三年四月

上諭豫省自去秋至今雨澤稀少現在已交夏令卽甘霖早晚霑沛止可趕種秋稼二麥已難望有收業經疊沛恩施

令該撫加意撫恤但被旱畧久民食不免稍艱其開封等
五府應征本年錢糧雖經降旨停緩但秋後仍須輸納民
力究不免拮据莫若將該省乾隆四十五年輪免錢糧卽
于本年先行蠲免其迤南各府州現已征收者卽作爲明
年正供在被旱之五府屬貧黎旣得免追呼卽有收之各
府屬亦可以其有餘供歉區糴買以資接濟該撫務董率
所屬實心經理毋使吏胥從中滋弊以副朕軫念民生之
至意該部卽遵諭行欽此

特恩發帑重修中嶽廟上諭乾隆四十三年六月

上諭據榮柱於六月初一日至嵩山告祭薰壇虔禱卽於六

月初二日甘霖大沛入土深透四野均霑等語覽奏

神明賜佑腹敬成詩一章應勒石紀恩並于摺內批示矣至

榮柱摺內稱

嵩嶽効靈雖屬相沿引用但以施澤濟民之事日爲効靈於

心深切不安嗣後凡遇此等措詞究宜斟酌爲是再

嶽神廟宇從前曾遭回祿後雖經重建恐未必能如前闕壯

茲

嶽祇靈應澍雨優霑以救通省數百萬生民之命

靈貺莫大乎此自宜敬修廟貌以咨

神庥所有工程經費鄭大進榮柱現任撫藩首先出貲葺治

義無可諉卽徐績久任河南巡撫去歲秋冬缺雨尚係伊任內之事理應一體出貲襄助其餘通省知府以上各員亦應酌捐廉俸共成勝舉如或工程浩大所捐之數尙不敷用不妨據實奏聞候朕添撥帑金亦無不可著交鄭大進確實查核並令榮柱親往逐一估勘妥爲經理務使廟貌巍煥悉復舊觀以妥神靈而昭秩祀俟工竣奏聞再將御製詩發往勒碑以紀神貺將此諭令知之欽此

特恩發帑重修中嶽廟上諭乾隆四十三年七月

上諭處鄭大進奏估勘修建嵩嶽廟工程及圍牆內外各

廟宇一併葺治其所需經費該撫及前撫徐績并現在之藩臬道府共捐銀三萬八千兩及各州縣呈請公捐養廉共銀八萬兩通計共十一萬八千兩派委專員經營辦理等語該省敬修嶽廟仰報神庥撫藩大吏及前任撫臣自應首先出貲修葺其現任知府以上身爲方面大員所得養廉亦厚自可聽其捐貲以襄盛舉至各州縣請分別缺分大小攤捐之處旣非政體且牧令非大員可比每歲所得廉俸本屬無多若因公扣捐所餘不敷贍給必致藉端擾累閭閻與其整飭于事後毋寧防之于未然所有州縣公捐之請不准行其捐款外所需銀八萬兩著用內

務府庫銀令鄭大進榮柱等核實辦理造報內務府核銷
 至此項銀兩即着該撫于應解戶部正項內扣用咨部備
 核仍令內務府照數撥還戶部以省解送之煩該撫等務
 須實力查察妥為經理俾廟貌巍峩工作鞏固以昭靈
 佑欽此

河南府志首卷之二

聖製

世祖章皇帝親政祭告中嶽

山文 順治八年

惟神環通八表雄峻中一統會陰陽交輝日月朕誕膺天

命祇荷神庥特遣專官申殷薦惟神鑒焉

祭告漢光武帝陵文 順治八年

追維明德奉天撫民盛宏勳萬世永賴陵寢所在英爽

如存茲特遣使齋捧香祇命有司致祭惟神鑒歆尚饗

祭告宋太祖太宗真宗仁山陵文 順治八年

聖祖仁皇帝登極祭告中嶽山文 康熙元年

聖製二

祭告漢光武帝陵文

康熙三十九年

惟帝中興鴻業勛被生民濟世之功垂於永久茲朕承立
大統謹用祭告尚饗

祭告宋太祖太宗真宗仁宗四陵文

康熙元年

自古歷代帝王繼天立極功德並隆治統道統昭垂奕世
朕受天眷命紹續丕基庶政方親前徽是景明禋大典亟
宜肇修敬遣專官代將在帛爰昭殷薦之忱聿備欽崇之
禮伏惟格歆尚其鑒饗

皇帝親政祭告中嶽嵩山文

康熙七年

祭告漢光武帝陵文

康熙七年

祭告宋太祖太宗真宗仁宗四陵文

康熙七年

皇帝建儲祭告中嶽嵩山文

康熙十五年

惟神環通八表雄峙中天統會陰陽交輝日月朕祇承神
佑懋建元儲特遣專官用申殷薦惟神鑒焉

祭告漢光武帝陵文

康熙十五年

自古歷代帝王繼天立極功德並隆治統道統昭垂宇宙
朕受天眷命撫御鴻圖建元儲前徽是景明禋大典亟
宜舉行敬遣專官代將在帛爰昭殷薦之忱聿備欽崇之
禮伏惟格歆尚其鑒饗

祭告宋太祖太宗真宗仁宗四陵文

康熙十五年

皇帝疆圉蕩平祭告中嶽嵩山文 康熙二十一年

惟神尊臨方夏位正中十統會陰陽均和寒暑朕祗承神佑疆宇蕩平特遣專官用申殷薦惟神鑒焉

祭告漢光武帝陵文 康熙二十一年

自古帝王受天顯命繼道統而新治統聖賢代起先後一揆成功盛德炳若日星誕膺眷佑臨制萬方掃滅兇殘廓清區宇告功古后殷禮肇稱敬遣專官代將牲帛爰修禮祀之誠用展景行之志仰祈明靈尚其鑒饗

祭告宋太祖太宗真宗仁宗四陵文 康熙二十一年 文同上

皇帝巡幸祭告中嶽嵩山文 康熙二十三年

惟神宅中永峙峻極常尊統會陰陽交輝日月朕祗承泰運時邁省方肅若舊章專官秩祀神其鑒焉

孝莊文皇后祔廟祭告中嶽嵩山文 康熙二十七年

惟神峻極中天尊臨方夏八埏交會兆類孳盈朕續承

祖宗丕基虔恭明祀茲以

皇祖妣孝莊仁宣誠憲恭懿翊天啟聖文皇后神主升祔

太廟禮成特遣專官用申秩祭惟神鑒焉

祭告漢光武帝陵文 康熙二十七年

自古帝王受天明命御曆膺圖時代雖殊而繼治同道後先一揆朕承天佑臨制萬方稽古禮文肅修祀事茲以

皇祖妣孝莊仁宣誠憲恭懿翊天啟聖文皇后神主升祔

太廟禮成特遣專官代將牲帛虔循禋祀之禮用抒景行之忱

仰冀明靈尚其鑒饗

祭告宋太祖太宗真宗仁宗四陵文

康熙二十七年文同上

皇帝以災禋祭告中嶽文

康熙三十五年

惟神峻極中天炳靈二室陰陽統會寒暑均調朕勤恤民
依永期殷阜邇年以來郡縣水旱間告年穀歉登晝夜孜
孜深切軫念用是專官秩祀為民祈福冀雨暘之時若庶
稼穡之屢豐惟神鑒焉

皇帝以塞北永清祭告中嶽文

康熙三十六年

惟神位次鶉首峻極中央統會四時坐奠八極朕以勦除
狡寇二履遐荒期掃邊塵又安中外今者祇承神佑塞北
永清用告成功專官秩祀惟神鑒焉

祭告漢光武帝陵文

康熙三十六年

自古帝王受天景命制治綏猷必禁暴除殘以又安黎庶
緬懷往烈道實同符朕欽承帝祉臨御九圍茲以狡寇跳
梁親征漠北蕩滌寇氛廓清邊徼永清兵革以與普天率
土樂育太和敬遣專官代將牲帛昭告古先哲后虔修禋
祀式彰安攘之模用展景行之志仰企明靈俯垂鑒饗

祭告宋太祖太宗真宗仁宗四陵文

康熙三十六年文同上

萬壽五旬祭告中嶽嵩山文

康熙四十二年

惟神峻極稱尊宅中表德儲精二室統會百靈朕祇承庥命統馭寰區夙夜勤勞殫思上理歷茲四十餘載今者適屆五旬海宇昇平民生樂業見輿情之愛戴沛下土之恩膏特遣專官虔申秩祀尚憑靈貺益錫蕃禧佑我國家共登仁壽神其鑒焉

祭告漢光武帝陵文

康熙四十二年

朕軫念閭閻巡行方嶽已遠臨乎西土還蒞止於中州歷覽山河經後漢之都邑遙瞻松柏慨前代之園陵惟帝御物推誠總綱立政克光祖德誕復前基稽古史而可徵遺端官以展祀靈其鑒格尚克歆承

祭告宋太祖太宗真宗仁宗四陵文

康熙四十二年

自古帝王繼天立極出震承乾莫不道洽寰區仁周遐邇朕欽承丕緒撫馭兆民思致時雍常殷惕勵歷茲四十餘載今歲適屆五旬宵旰兢兢無敢暇逸漸致民生康阜世運昇平頃因黃淮告成新行巡歷再授方畧善後是期觀民志之歡欣滋朕心之軫恤遘回鸞馭大沛恩膏用是專官敬修祀典冀默贊郵隆之治益宏仁壽之庥尚鑒精誠俯垂昭格

皇帝復儲祭告中嶽嵩山文

康熙四十八年

惟神中天定位二室奠形和會陰陽鈞調寒暑朕仰荷天
庥撫臨海宇建立元良歷三十餘載不意忽見暴戾狂易
之病深維

祖宗洪業及萬邦民生所係至重不得已而有退廢之舉嗣後
漸次體驗當有此事時性生奸惡之徒各庇邪黨借端
搆讟朕覺其日後必成亂階隨不時究察窮極始末因而
確知病原皆由鎮壓所致亟爲除治幸賴

上天鑒佑平復如初朕比因此事耗損心神致成劇疾皇太子
晨夕左右憂形於色藥餌必親寢膳必視惟誠惟謹歷久
不渝令德益昭丕基克荷用是復正儲位永固國本特遣

專官敬申殷薦惟神鑒焉

祭告漢光武帝陵文

康熙四十八年

朕維自古帝王正位臨民代有令德是以享祀千秋用昭
鉅典朕仰荷天庥撫臨海宇建立元良歷三十餘載不意
忽見暴戾狂易之疾深惟

祖宗洪業及萬邦民生所係至重不得已而有退廢之舉嗣後
漸次體驗當有此事時性生奸惡之徒各庇邪黨借端
搆讟朕覺其日後必成亂階隨不時究察窮極始末因而
確知病原皆由鎮壓所致亟爲除治幸賴

上天鑒佑平復如初朕比因此事耗損心神致成劇疾皇太子

晨夕左右憂形於色藥餌必親寢膳必視惟誠惟謹歷久不渝令德益彰丕基克荷用是復正儲位永固國本特遣專官用申殷薦尚其歆格

祭告宋太祖太宗真宗仁宗四陵文

康熙四十八年文同上

壽六旬祭告中嶽嵩山文

康熙五十二年

維神宅土居中極天表峻儲精二室被德羣生朕纘受鴻圖撫臨區宇殫思上理夙夜勤求惟日孜孜不敢暇逸茲御極五十餘年適當六旬初屆所幸四方寧謐百姓乂和稼穡登風雨時若維庶徵之協應爰羣祀之虔修特遣專

循舊典冀益贊雍熙之盛尚永貽仁壽之庥俯鑒精

忱用垂歆格

祭告漢光武帝陵文

康熙五十一年

自古帝王繼天立極建極綏猷莫不澤被生民仁周寰宇朕躬膺寶歷仰紹前徽夙夜孜孜不遑暇逸茲御極五十餘年適當六旬所幸四方寧謐百姓乂和稼穡歲登風雨時若維庶徵之協應爰羣祀之虔修特遣專官式循舊典冀益贊雍熙之運尚永貽仁壽之庥俯鑒精忱用垂歆格

祭告宋太祖太宗真宗仁宗四陵文

康熙五十二年文同上

孝惠皇后耐廟祭告中嶽嵩山文

康熙五十八年

惟神極天標峻宅土居中和會八方滋培萬類朕纘承

祖宗丕基虔恭明祀茲以

皇妣孝惠仁憲端懿純德順天翼聖章皇后神主升祔

太廟禮成特遣專官用申秩祭惟神鑒焉

祭告漢光武帝陵文

康熙五十八年

自古帝王受天景命建極綏猷垂萬世之經常備一朝之典禮朕欽承帝祉臨御九圍夙夜惟寅敬將祀典茲以

皇妣孝惠仁憲端懿純德順天翼聖章皇后神主升祔

太廟禮成特遣專官代將牲帛用展苾芬之敬聿昭禮祀之虔

仰冀明靈尚其歆格

祭告宋太祖太宗真宗仁宗四陵文

康熙五十八年

世宗憲皇帝登極祭告中嶽嵩山文

雍正元年

惟神宅土居中極天表峻儲精二室被德羣生朕纘受丕基新承景命竊念

皇考膺圖以來百靈効順四海從風坐享昇平六十餘載茲當

嗣位之始宜修享祀之儀特遣專官虔申昭告惟冀時和

歲稔物阜民安淳風遍洽乎寰區厚德長敷於率土尚其

歆格鑒此精誠

祭告漢光武帝陵文

雍正元年

自古帝王繼天出治建極綏猷莫不澤被生民仁周海宇
維我

皇考峻德鴻勳媲美前古顯謨承烈垂裕後昆朕以眇躬繼膺
大寶當茲嗣位之始宜修享祀之儀特遣專官虔申昭告
惟冀時和歲稔物阜民安淳風遍洽乎寰區厚德長敷於
率土尚其歆格鑒此精誠

祭告宋太祖太宗真宗仁宗四陵文

雍正元年
文同上

聖祖仁皇帝配享禮成祭告漢光武帝陵文

雍正二年

自古帝王體天立極表正萬邦愷澤遍於寰區仁風及於
奕禩朕丕承大統遙契曩徽茲於雍正元年十一月二十
五日恭奉

聖祖合天弘運文武膺哲恭儉寬裕孝敬誠信功德大成

仁皇帝主配享圜丘禮成特遣專官虔申昭告惟冀永贊修和
之治益昭安阜之庥鑒此精誠尚其歆格

祭告宋太祖太宗真宗仁宗四陵文

雍正二年
文同上

皇上登極祭告中嶽嵩山文

乾隆元年

惟神望崇峻極迥峙中州和會陰陽生靈資福朕繼承大
統仰紹前徽伏念

皇考臨御以來敬祀明神肅將禋祀靈祇孚應昭受鴻庥清晏
奠安茂登上理茲當嗣位之始宜隆望秩之儀特遣專官
虔申告祭惟冀雨暘時若年穀順成萬方蒙樂育之庥兆
姓荷帡幪之德尚其歆格鑒此精誠

祭告漢光武帝陵文 乾隆元年

禮崇典祀光俎豆于前徽念切景行薦馨香于往哲維皇
繼天建極撫世誠民豐功焜耀於簡編駿烈昭垂於宇宙
溯典型於在昔稟法監之常存朕以藐躬繼登大寶屬膺
圖之伊始宜展祀以告虔特遣專官祇遵彝典苾芬在列
備三獻之隆儀靈爽式憑仰千秋之明德尚其歆格永錫
鴻禧

祭告宋太祖太宗真宗仁宗四陵文

乾隆元年
文同上

世宗憲皇帝配享禮成祭告漢光武帝陵文

乾隆二年

自古帝王憲天出治建極綏猷德澤洽于萬方軌範昭于

百世朕纂承鴻緒景仰前徽茲乾隆二年四月六日恭奉

世宗敬天昌運建中表正文武英明寬仁信毅大孝至誠

憲皇帝主配饗園丘禮成特遣專官虔申昭告維冀永佑雍熙
之盛益昭安阜之隆庶鑒精誠尚其歆格

祭告宋太祖太宗真宗仁宗四陵文

乾隆二年
文同上

皇上時巡祭告中嶽嵩山文

乾隆十三年

惟神雄標峻極位鎮中央靈氣鬱蟠陰陽和會朕仰承不
緒時邁省方載舉舊章專官秩祀神其鑒焉

中宮攝位

慈寧晉號祭告中嶽嵩山文

乾隆十四年

惟神位宅天中德標峻極陰陽和會八表具瞻茲以邊徼
救寧

中宮攝位

慈寧晉號慶洽神人敬遣專官用申殷薦神其鑒焉

祭告漢光武帝陵文 乾隆十四年

惟皇繼天建極撫世綏猷教孝莫先於事親治內必兼於
安外典型在望模楷常存茲以邊徼救寧

中宮攝位

慈寧晉號慶洽神人敬遣專官用申殷薦仰惟歆格永錫鴻禧

祭告宋太祖太宗真宗仁宗四陵文 乾隆十四年

中宮正位

慈寧晉號祭告中嶽嵩山文 乾隆十五年

惟神位宅天中德標峻極陰陽和會八表具瞻茲以正位

中宮鴻儀懋舉

慈寧晉號慶洽神人敬遣專官用申殷薦神其鑒焉

皇上巡幸洛邑諭祭洛陽祠廟文

諭祭周公廟文 乾隆十五年

惟公碩膺天授才藝性成紹家學以繫文啟千秋之奧旨
定朝常而制禮開萬世之太平勤施在輔治之年勲勞莫
大篤棗立為臣之極德業如新雖錫胙土於魯邦山河猶

在而殫經營於洛邑俎豆斯存朕稽古制而時巡指中州
而稅駕遙瞻祠宇如親赤舄之容式觀棖題緬想袞衣之
範爰修秩祀特遣專官鑒此苾芬靈其歆格

諭祭關林文

乾隆十五年

惟神德兼文武氣塞乾坤學紹孔門默契春秋之旨力扶
劉祚長懷忠義之忱封賜還曹向背之分別若越關歸漢
綱常之際凜然懸皎日於丹雘鑿逾金石仰英風於奕世
信格豚魚所以赫濯聲靈合白叟黃童而肅拜抑且馨香
俎豆遍遐陬僻壤以欽永大節隆名永著休光於史冊佐
民福國宜昭崇報於熙朝朕法古時巡至於中嶽瞻松楸
之在望肅遣專官將牢醴以告虔用申特享神其歆格鑒

此明禋

諭祭宋儒范仲淹祠文

乾隆十五年

惟爾淵通經術茂樹風猷攻苦辛勤守畫粥斷菹之素仔
肩艱鉅表先憂後樂之心名動諸羌奠危疆於磐石識高
同列垂讜論於簡編誠悃素孚屬國知龍圖之號褒賢擅
美桓稗留馬鬣之封朕巡幸中州道經嵩洛雅懷芳躅有
粹然儒者之風緬想遺規流溥矣仁人之澤爰修祀典用
薦苾芬神如有知尚其歆格

諭祭宋儒司馬光祠文

乾隆十五年

惟爾德器渾全勲猷彪炳功高定策居然社稷之臣志在安民偉矣帝王之佐規黼展而伸讜論三朝共仰訃謨綜史籍而訂鴻編千載猶資啟沃語皆不妄肇開伊洛之淵源學戒勿欺允姪范韓之忠蓋禮崇侑食久祀專祠朕稽古時巡泣茲中土昔傳粹德繫兒童走卒之心今溯懿徽想洛社耆英之盛爰修秩典用遣專官神爽如存尚其歆格

諭祭宋儒邵雍祠文

乾隆十五年

惟爾質稟高明學窮蹟隱陰陽動靜玩變化於一心生長收藏謚經綸於四府掌文指節能占法象之奇月到風來自得性靈之樂湛虛明於心體世服前知化忠厚於鄉閭士稱純德遺風未昧美報宜隆朕時邁嵩高觀風伊洛里居不遠猶傳安樂之名祠宇如新還想漁樵之唱載深嘉尚用薦明馨靈如有知尚其來格

諭祭宋儒程顥祠文

乾隆十五年

惟爾質抱中和學通道器德輝交暢表和風甘露之襟寧宇不撓昭峙嶽澄淵之度貫精誠於金石君相爲之動容闢正路之榛蕪豪彥於焉歸往竟其施設居然三代之英考厥生平豈在大賢以下道光豐石功著遺經朕時邁中州觀風洛邑瞻言遺愛如聞衆母之呼慨念斯文想見真

儒之概遣專官而展祀冀歆格於神靈

諭祭宋儒程頤祠文

乾隆十五年

惟爾學本誠明性成方大繼太和之清節旣肯構而肯堂
婉伯氏之純修亦難兄而難弟事君以道大臣諤諤之風
與聖爲徒儒者巖巖之象求孔顏之純學樂有在於曲肱
闡爰彖之微言道匪遙於下帶允作六經之羽翼宜隆千
秋之馨香朕以時巡蒞茲伊洛念哲人於彷彿依然立雪
之門覽祠廟以輝光應比春風之座用將祀事式遣專官
惟冀神靈尚其歆格

諭祭宋臣呂蒙正祠文

乾隆十五年

惟爾稟質溫純立朝端介早修孝養篤雍睦於家庭游歷
鈞衡贊謨謀於密勿獻讜言而無隱惟矢蓋誠謝面斥而
不聞獨高雅量屢陳利害同列畏其方嚴三拜平章當宁
知其直諒朕省方中土道出祠庭喬木垂柯羨承家之餘
蔭名園歸老緬幸第之殊榮爰遣專官用修苾芬神其昭
鑒享此精禋

諭祭宋儒朱熹祠文

乾隆十五年

惟朱子間氣鍾英純儒體道稚齒戲於沙上卽圖八卦之
文遺書立於學宮重定六經之傳官榮屢讓薄俗知易退
之風政事可觀巨屏有得賢之慶設科而明師道講學以

主敬為宗拜手而進昌言致主以正心為本實儀型於百世宥俎豆於千秋朕稽古省方言巡中嶽訪遺規於祠宇恍接清徽溯道統之淵源彌嘉令範式修秩祀祇薦明馨惟冀神靈尚其歆格

皇太后六旬萬壽祭告中嶽嵩山文

乾隆十七年

惟神位宅天中德標峻極陰陽和會八表具瞻茲以

慈寧萬壽懋舉鴻儀敬晉

徽稱神人慶洽特遣專官用申秩祭神其鑒焉

祭告漢光武帝陵文

乾隆十七年

惟皇憲天作極受錄承庥教孝莫先於事親歛福用光乎繼治是彝是訓緬惟至德要道之歸壽國壽人允懷錫類推恩之盛茲以

慈寧萬壽懋舉鴻儀敬晉

徽稱神人慶洽爰伸殷薦特遣專官冀鑒茲忱永綏多福

祭告宋太祖太宗真宗仁宗四陵文

乾隆十七年
文同上

平定準噶爾大功告成上

皇太后徽號祭告中嶽嵩山文

乾隆二十年

惟神雄峙中天德標峻極均和寒暑統會陰陽茲以平定準噶爾大功告成加上

皇太后徽號神人洽慶中外蒙庥敬遣專官用申秩祭神其鑒

聖製二

焉

祭告漢光武帝陵文

乾隆二十年

惟帝建極乘時綏猷馭世制臨無外德威之服遠者神教化有原孝道以尊親為大景典型於在昔實天經地義之不昭宏佑啟於方來惟文治武功之交稟茲以平定準噶爾大功告成加上

皇太后徽號神人洽慶中外蒙庥敬遣專官用申禋祀伏惟鑒

格

祭告宋太祖太宗真宗仁宗四陵文

乾隆二十年文同上

蕩平回部祭告中嶽嵩山文

乾隆二十四年

惟神位正中央體凝峻極柳張分次麗乾曜之七星河洛鍾靈奠坤輿於兩戒四表之陰陽交會萬方之風雨同和茲以逆回蕩平大功底定慶六師之克捷我武惟揚仰二室之巍峩鴻庥遠庇敬舉告功之典用申秩祀之文式薦馨香伏惟昭鑒

祭告漢光武帝陵文

乾隆二十四年

惟皇建極綏猷經文緯武誕敷德教仁義備其漸摩克詰戎兵聲靈彰其赫濯惟恩威之兼濟先後道本同符斯命討之昭垂今古功歸一軌茲以西師克捷回部蕩平緬駿烈於前型敷奏其勇遠徂征於絕域遍觀厥成中外歡騰

神人協慶專官肅祀昭鑒惟歆

祭告宋太祖太宗真宗仁宗四陵文

乾隆二十四年文同上

皇太后七旬萬壽祭告中嶽嵩山文

乾隆二十七年

惟神望重嵩高位臨洛汭產菖蒲之九節開貝葉以三花
室判東西遙仰羣真嶽降誠通響應曾傳夾道山呼茲以

慈闈萬壽懋舉鴻儀敬晉

徽稱神人慶洽仰靈祇於嵩嶽敬奉明禋修祀典於中州聿申

祇告特修殷薦用答神庥

祭告漢光武帝陵文

乾隆二十七年

惟帝本仁祖義明物察倫修人紀以綏猷則天經而立極
綉羹牆其可接先後攸同奉俎豆以常新楷模斯在茲

慈闈萬壽懋舉鴻儀敬晉

徽稱神人慶洽展尊

親之義思克紹夫前型廣錫類之仁期永綏夫後祿爰申祀

式薦馨香尚鑒惻忱俾膺多福

祭告宋太祖太宗真宗仁宗四陵文

乾隆二十七年文同上

皇太后八旬萬壽祭告中嶽嵩山文

乾隆二十七年

惟神配天作鎮應地凝基填星正位乎中央山勢雅歌夫
峻極石壇春滿貝樹長而三花瑤草雲封菖蒲生而九節
茲以

慈闈萬壽懋舉鴻儀敬晉

徽稱神人慶洽仰靈祇於嵩嶽石髓流膏紀祥瑞於仙臺山呼

俶慶爰申昭告用答神庥

祭告漢光武帝陵文 乾隆三十七年

惟帝體元則天撫世誠民勲被寰區德昭往古羹牆匪隔
累朝之統緒相承俎豆維新歷代之英靈如在茲以

慈闈萬壽懋舉鴻儀敬晉

徽稱神人洽慶孝道以尊

親為大式仰前型

母儀之錫類者宏永綏厚福懿章載舉祀典斯崇布胥靈以告

虔庶靈明之來格

祭告宋太祖太宗真宗仁宗四陵文

乾隆三十七年
文同上

平定兩金川大功告成祭中嶽嵩山

乾隆四十一年

惟神柳曜分躔洛濱聳峙環維翊拱乘土德而居尊峻極
比隆宅中天而作鎮風雨因茲而和會巖巒益顯其靈奇
茲以兩金川小醜削平大功底定張國威於九伐邊徼攸
寧答神貺之三呼明禋斯秩敬展欽柴之典虔申昭告之
文薦此馨香伏惟歆鑒

祭告漢光武帝陵文

乾隆四十一年

惟帝德洽恩威義嚴彰瘡鋤奸禁暴昭命討之無私輯遠

綏荒振聲靈之有赫茲以兩金川大功全藏逆黨咸俘殄
遺孽於番風戢武協求寧之志編豐功於前代慶成覲者
定之休特遣專官肅將禋祀惟冀鑿歆

祭告宋太祖太宗真宗仁宗四陵文

乾隆四十一年
文同上

河南府志首卷之三

聖製

聖祖仁皇帝御製詩

由豫省回鑾過孟津詩

康熙四十二年

遙望嵩峯欲逼天太行綿亘洛陽川金明池畔無烽火醉
白堂前起玉煙千里中州古擊壤兩河分界舊原田扁舟
穩渡觀民俗休養心殷冀有年

皇上御製詩

渡孟津河恭依

皇祖元韻

乾隆十五年

方舟氣霽涼收天後海先河凜祭川所冀安瀾九曲水永

寧率土萬家煙萬家煙火隨民便皇祖御製句也

山太少修殷祀澗水東西祝大田芝篆豐碑重捧讀益欽

繩繼仰堯年

渡河舟中作

惟天有漢地有河其源則一理豈論時巡嵩洛初渡過清

秋浪靜暄且和樓船捩柁發櫂歌濤聲砰礚鼓靈鼉黃頭

相顧喜色多訝逢希有之恬波我昔澄海縱遐職此輪彼

受均難為叶壯哉大觀抒雄噉

題洛陽都亭

洛陽都亭名自故云是文紀埋輪處豺狼當道置狐狸十

五事陳逆當路王家爛鑿何曾悟連踵雲臺身犯霧鳶肩

豺目志跋扈廣陵出守單車去尚勝杜喬及李固位至三

公乏匡助瘦死獄中應悔誤

洛陽道中八韻

朱曦麗雲罕絳氣拂星旃喜色盈茅屋歡心歷麥田榮光

直北望華蓋迤南連百雉今雄郡三河古帝屢翻經白馬

寺呈瑞玉雞川柳綠搖秋暝菊黃擎露圓山猶圍闕塞莊

已失平泉為想衣冠會深思治亂緣

香山寺雜咏

華幹西來走嵩嶽龍門中斷放清伊果然佳景無窮盡潑
眼驚看此最奇

依巖古洞號賓陽乳竇冬温夏却凉龍口噴成珠瀑落逝
將學海一川長

畫舫撐過伊水平向來小坐白雲橫叢筍深處飛欄外留
我敲吟一聯情

攀躋直到香山寺尋遍殘碑可惜生內翰書屏猶述古

居易記已無存惟餘近年間翰林注
士鉉所書居易香山記刻於屏間
易修香山寺記云予為微之作墓誌元氏具銀幣
鉅萬志謝予念平生分堅辭不獲乃回施茲寺

題香山寺二首

龍門凡十寺第一數香山自古才華地當秋旱蹕聞闕峰
迎截薛伊水俯潺湲始見人楓葉霜前三兩殷

靜室暫周旋興懷每翠然如斯看水逝不改是峰連畫意
誰能貌吟情祇合蠲慮輸白少傅已著祖生鞭

登緱山極目

緱嶺巖崿嵩嶽連傳聞子晉此昇仙割來太室三分秀望
去清伊一帶綿歡豫民情他園苑菁芊麥色我芝田孜孜
求治猶多愧無暇重繙學道篇

少林寺作

少林千載寺少室一房山禪悅偶重叩

雍正年間會蒙
皇考指示禪宗

妙諦而此處又為達摩面壁處故云秋巖此乍攀樹姿紛綺繡澗響靜潺湲却見來時路輾轅雲外關

題面壁石

大地那非碧眼僧九年面壁却何曾宋雲道是逢葱嶺五葉原教到慧能片石無端留色相千秋不必考明徵我非見布疑贗者畫取由他故事增石中隱隱具初祖面壁之相或係偽為而神采渾穆特手為摹本以歸

宿少林寺用唐沈佺期韻

明日瞻中嶽今宵宿少林心依六禪靜寺據萬山深樹古風留籟地靈夕作陰應教半巖雨發我夜窗吟

雨

止頓暮山蒼秋霖入夜長慣經曾塞北初值此嵩陽寒上山靈者經過必遇雨雪詎止前塵淨端資潤麥香途中見麥苗茲至中嶽亦然頗待澤茲雨實有益來朝林外路馬上試新涼

會善寺

外方多實地淨域闢雲關自占山川秀遙看花樹殷到來塵念息試坐穉冬閑時十月朔日紺宇怡神靜丹梯舉足攀龍池噴德水雁閣禮華鬘太少無窮奧於茲見一斑

嵩陽書院

書院嵩陽景最清石幢猶紀故宮名舊名嵩陽宮宮前石幢載唐明皇求仙得

藥事虛誇妙藥求方士何似菁莪育俊英山色溪聲留宿雨
菊香竹韻喜新晴初來豈得無言別漢栢陰中句偶成

漢栢行

我曾快讀杜甫詩千秋絕作嘆莫比嵩陽今見漢時栢學
步吟懷不能已久與公孫並得名潁川嵩岳近尺咫潁川
馬鬣尚存無嵩岳龍身猶故爾世人安得如汝壽休論一
在一已燬是時雨後涼颺起瀏莅卉歛聲盈耳金幢玉節
舞其翩瑞鳳祥鸞集爰止栢下平鋪金粟紙寫形要欲寫
其理浮邱伯周王子風雨晦冥翱翔是倘更逢之亦圖彼

謁嶽廟

正正堂堂地巍巍煥煥京到來瞻氣象果足慶平生愜我

長年願

去年卽降
旨祠嶽

陳茲祈歲情忽聞鸞鶴韻疑有列仙迎

嶽廟秩祀禮成有述

明禋親舉備宮懸德並高峯峻極天秩視三公伊古重名
尊五嶽匪今然會其有極神如在允建于中道豈偏盼嚮
願陳心所願篤生申甫佐蕃宣

登嵩山華蓋峰歌

高高峻極周雅談居中鎮東西朔南宇宙以來鮮比參時
巡秩祀駐絳繆殷禮歲事神人欣一登絕頂衆妙探宿攄
丹藥求仙岳無事登封埋玉函侍臣告我初寒添太室黯

默凝雲嵐我笑謂之正所耽不宜返轡山靈慙神區奧壤
 貴靜恬千乘萬騎紛奚堪策馬戒從遵路巉異哉所見真
 不凡二十四峯左右咸中為華蓋尊且嚴俯視羅列如孫
 男不須縷指其名括少室三十六峯尖向者背者都包含
 以河為帶潁為襟唐為宮復為俗隆崇案衍窳以窳
 翠嶺截薛摧峯嵌丹黃紫翠青碧藍聲分卉歛氣兮醜博
 大富有莫不兼幻以雲容技畢覃英英雷雷滃曇曇變遠
 為近夷為險黃山雲海歌德潛沈德潛近有如遇嬌日
 矜無鹽泰山昔亦陟巖巖引興未似今茲酣携來雙鶴其
 羽甃放去聊任王喬驂時地方大吏有進仙鶴者携至華蓋峯放之卓午躡景
 歸駮驪紛迎老幼圍層岷警蹕不飭任就瞻尊親亦可民
 情覘呼萬歲者奚啻三

新月

過雨琉璃潔入冬蝦蟇冷武帳冰去聲夜唼豫天影遐嶺怡

神在次寥流藻契虛靜可惜別嵩門太室玉柱峯東兩峯夾峙每月初生正從

峽中出志載嵩門待月為茲山佳勝未一攬清景

命吳應枚圖嵩山華蓋峯仍疊前韻

卽景不能默於談昨來瞻嶽洛以南其峯造極愜靜叅華
 蓋之下停龍絲償我夙願引我快目所攬結興欲探詎惟
 一壑與一岳維嶽與鎮都包函是宜紀詠詩囊添問上問

下隔層嵐其呼萬歲奚足耽無德登封實可慙不如校景

收清恬石磻曲折路尚堪底須鑿鑿劣崩巉下視羣峭知

其凡金臺玉鏡皆峰名積翠咸鐵梁大小皆峽名殊森嚴搗衣

玉女不嫁男常有雲物供繡拈嵩門待月纔眉尖謫仙人

宅萬古舍大化冥合開胸襟如響應聲空谷谿侍臣賡韻

艱谿深磨崖孽窠大字嵌他年誰其青出藍莫使薜荔蒙

茸菴爾枚闕里歸程兼應枚奉差祭告曲阜孔廟歸程抵真定復命要當詩畫

藝兩覃無舉柱史及瞿曇名教之中樂無險漫云月窟天

心潛太羹有味匪醯鹽試走健筆為雲巖鬼神入處氣益

酣兩行烟柳疎綫燕山趙水迎歸驂長歌還憶陟巘驪

題幀何異書崇嶼攜歸温室資吟瞻香光家法待更覘將亦

命董邦達圖之是謂舉一乃得三

命董邦達圖嵩山華蓋峯再疊前韻

周禪瀛海逞辯談強分疆界朔與南運諸掌上默以叅何

須遍歷揚旂縈其間民物戚及欣用懷康又時籌探省方

詎惟賞川岳曰有深義於中函鼓舌底慮浮議添秩祀嶽

廟瞻遙嵐華蓋左右飛興耽竟不能登我實慙山靈雲物

意趣恬投我無報其奚堪仄徑追攀未覺巉造極下視殊

仙凡空谷有聲應速成剛柔合德均寬嚴大矣時義稱少

男盪胸決皆供吟拈無所假借羣峯尖天中衆美已畢含

百五十里做神襟虛牝頰洞氣長裕廣生博大穹窿窅飛
泉漱石玲瓏嵌幾曾點綴資精藍道之猶覺齒頰醜應枚
小試霜毫兼亦云其可力已覃譬之言佛必瞿曇是理易
喻非奇險執抉窅奧開幽潛如恒河中投井鹽爾達素工
爲雲巖定當技癢落筆酣松窻月影寒穆穆靜觀絕藝誰
方驂使我興在驅驪驪曰某層峯曰某嶼一一聚米同親
瞻陳迹俯仰頻懷覘快哉長韻賡其三

